

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut:

1.1 Tunuliaqutarisaq:

Kalaallit Nunaanni efterskoleqalernissaq Naalackersuisut nikerartut aamma Inatsisartuni partiit ilaasortallu tungaanniit ukiuni arlalinni kissaataavoq. Kisianni ukiuni siuliini aningaasatigut periarfissat nassatarisarsimavaat, efterskolit atuartitsivissaannik ineqarfissaannillu pilersitsinissamut ingerlatsinermullu atugassanik aningaasaliisoqarsinnaasarsimangimmat.

2005-imi Inatsisartut upernaakkut ataatsimiinneranni taamani Naalackersuisuusut "Danmarkimi efterskolertarnermut tapiissuteqartarnerup aqqissugaaneranik naliliineq pillugu nalunaarusiaq" saqqummiuppaat. Nalunaarusiami tikkuarneqarpoq, inuusuttut Danmarkimi efterskolernermi tapiiffigineqarnissamut naammattunik qallunaatut piginnaasaqanngitsut ilinniartitaanikkut neqeroorfigineqarnissaat pisariaqartinneqartoq. Aammattaaq tikkuarneqarpoq, Kalaallit Nunaanni inuusuttunut efterskolernermikkut qallunaat oqaasiisigut piginnaasaminnik annertusaanissamik pingaarnerpaatitsinngitsunut allatut ittumik naapertuuttumillu neqeroorusiortoqarnissaa pisariaqartinneqartoq. Nalunaarusiami aammattaaq tunngavilersorneqarpoq, Danmarkimi efterskolernissamik neqeroorutaasartunit allaanerumumik imaqartunik pilersitsinissaq pisariaqartinneqartoq, kiisalu tunngavilersorneqarluni ilinniartitaanikkut neqeroorutit inuusuttunut Kalaallit Nunaata avataaneersunut pilerinarsinnaasup pilersinnissaa pisariaqartinneqartoq. Pisariaqartitsinerit qulaani eqqaaneqartut innersuullugit inassutigineqarpoq Kalaallit Nunaanni efterskolit pilersinnissaat siunertaralugu piaarnerpaamik inatsitigut aningaasaqarnikkullu sinaakkusiisoqassasoq.

Naalackersuisut ilinniartitaanermut pilersaarutissatut siunnersuutaanni december 2005-imeersumi nassuiarneqarpoq, ilinniagaqassagaanni ilaatigut piumasarineqartut pisariaqartumik qallunaat tuluillu oqaasiinik piginnaasaqarnissaq. Kisianni inuusuttut ataatsimut amerlassusaannut naleqqiullugu amerlavallaat ilinniakkaminnik naammassinnittanngillat - oqaatsitigut piginnaasat killeqarnerat pissutigalugu. Naalackersuisut siunnersuutigaat, qallunaatut oqaasiliunerusunut ilinniakkatigut neqeroorutit saniatigut, innuttaasunut kalaallisuinnaq oqaasilinnut ilinniakkatigut neqeroortoqassasoq, inuusuttunut Danmarkimi efterskolerniartunut tapiisarnermik aqqissuussineq attatiinnaraluarlugu.

Taamatut periusissamik pilersaarusiornerup ilaatut Naalakkersuisut ilaatigut Kalaallit Nunaanni efterskolinik pilersitsinissamik periarfissiinissaq qularnaarumavaat, taannalu sallerpaatillugu tassaassaaq inuusuttunut naammattumik qallunaatut oqalussinnaannginnertik pissutigalugu Danmarkimi efterskolinut isersinnaanngitsunut neqeroorutaasoq. Inassutigineqarpoq Kalaallit Nunaanni efterskolip sallerpaatillugu qiteritissagai qallunaat tuluillu oqaasii, aappaattulli aamma kalaallit oqaasii - Kalaallit Nunaanni inuusuttunut kalaallisut oqalussinnaanngitsunut -neqeroorutigalugit. Pingajuattut atuartsissutaasut tassaasinnaapput ilaatigut inuusuttunut pilerinartut ilaatigullu Kalaallit Nunaanni inuussutissarsiutinut ineriartortitanut sammisut - soorlu takornariaqartitsinermut.

Naalakkersuisut ilinniartitaanermut pilersaarutissatut siunnersuutaanni december 2005-imeersumi qularnaarneqarpoq 2006-imi 2007-imilu 0,5 mio. kr. sumiiffinni ataasiakkaani qitiusumiillu inerisaanissamut immikkoorsisoqarnera. 2008-mi aamma 2009-mi ukiut aningaasaliiffiusut tamaasa 4 mio. kr. immikkoortinneqarput pilersitsinermut ingerlatsinermullu Namminersornerullutik Oqartussaniit tapiissutissatut.

2006-imi 2007-illu aallartinnerani taamanikkut Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfiusup Kalaallit Nunaanni efterskoliliornissamut pilersaarusiata tallimat tiguai. Pilersaarusiata taakkua aallaavigalugit Naalakkersuisut toqqarpaat Qasigiannuani 2009-mi efterskoliliornissaq taparserumallugu. Tulliullugu Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfiup Qaqortumi Sulisartut Hujskoliat isumaqatigiissuteqarfigaa ukiumi atuarfiusumi 2008/09-mi utaqqiisaasumik efterskolit atuartitsinissaq pillugu. Sulisartut Hujskolianni utaqqiisaasumik efterskolit atuartitsinissap siunertaraa 2008-mi ukioqatigiiaat marluusut meeqqat atuarsianniit anisussat ilinniartissarsinissaannik ajornartorsiutaajunnartut ikiorsiiffiginissaat.

Taamaattoq tassunga atatillugu eqqaaneqassaaq inatsisiliornissamik suliniutip matuma nalinginnaasumik efterskoliliornissamut sinaakkutissat pilersimmagit. Taamaalilluni efterskolit pisortatigoortumik namminersortumillu ingerlassat pilersinneqarsinnaanerat periarfissinneqarpoq.

1.2 Siunertaq:

Efterskolit suliffeqarfiupput imminnut pigisut, pingaartitatut namminneq toqqakkatik aallaavigalugit inuusuttunut 14-it 17-illu akornanni ukioqartunut nerisaqarlunilu ineqarfiit aqutigalugit atuartitsinermik neqerooruteqartut. Efterskolit, meeqqat atuarsiinut atuarsiinnullu namminersortunut naleqqiullugit, immikkut illuinnartunik ilikkariartornissamut avatangiiseqartitsipput, tassami minnerpaamik ulluni tallimani ullut tamaasa atuartsinerup saniatigut, ilinniartitsisut atuartullu sapaatip-akunnerisa ulluini unnuaanilu arfineq-marlunni tamani ataatsimoornissaminnut periarfissaqarput, atuarsiit nerisaqarfiullutillu ineqarfiunerat aqutigalugu. Ulluinnarni atuartsinerup efterskolillu aqqissugaanerata, efterskolit nallernissaqanngitsumik periarfissippai, atuartut nalinginnaasumik atuartsissutinilu sammisassanik ilikkariartorneranni, ilinniartitsisut atuartsineranni aamma

sammisassat pilersaarusiaariinngitsut pilersaarusiorkkallu aqputigalugit efterskolimilu ataatsimoorneq aqputigalugu ataqtigiissitsinissamut.

Efterskolit inuusuttut atuartitaasussaataanerisa piviusunngortinnissaanut peqataasinnaapput, meeqqat atuarfianni inaarutaasumik naliliinerit ingerlannissaat neqeroorutigalugit.

Ukiuni kingullerni qulini Danmarkimi efterskolernissaq annertusiartortumik soqutigineqarpoq. Inuusuttut Kalaallit Nunaanni efterskolernissamut periarfissaqanngimmata, qinnuteqartut tamarmik Danmarkimi efterskolinit innersuuneqartariaqartarput.

Sulisartut Hujskoliata ukiumi atuarfiusumi 2008/09-mi efterskolitut atuartitsinissaq neqeroorutigimmagu qinnuteqartut katillugit 347-upput. 10. klassimi atuartut 147-t, 2008-mi junimi meeqqat atuarfianni naammassisussat Sulisartut Hujskolianni efterskolerniarlutik qinnuteqarput. 11. klassimi atuartut 128-t, 2008-mi junimi meeqqat atuarfianni naammassisussat efterskolernumallutik qinnuteqarput, inuusuttullu 53-it meeqqat atuarfianni naammassereernikut qinnuteqarlutik.

Kalaallit Nunaanni efterskolimik pilersitsineri siunertaavoq atuartut nalinginnaasumik ineriartortornerannut pitsaanerpaanik sinaakkusiinissaq, ataatsimoornermut avatangiisit demokratiskiusumik peroriartortornermut silarsuarmilu ataatsimoorfiusumi allanik ataqqinninnermik innuttaaqataaanermillu siuarsaasut avatangiiseralugit - tassanilu piumasaqaataasunut ilaapput ataatsimoornerup, akisussaanerup ilinniartitaanermilu ataatsimoorfinnut nammineq peqataanissamut piareersimanissaq.

1.3 Inatsissatut siunnersuutip suliarinera:

Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup Kalaallit Nunaanni efterskolini ilinniartitsineri pilersitsiniarnermik suliaqarnermi attaveqarfigai Oqaatsinik Pikkorissarfik, kommunit, Knud Rasmussenip Hujskolia, Sulisartut Hujskoliat aamma Danmarkimi efterskolit. Annermik Oqaatsinik Pikkorissarfik Danmarkimi efterskolit pillugit ilisimasaminik tunniussaqaqarnikuuvoq.

1.4 Inatsisit atuuttut:

Maanna efterskolit aqutarineqarput Meeqqat atuarfiat pillugu Inatsisartut inatsisaanni nr. 1-imi, 6. juni 1997-imeersumi, § 10, imm. 5 aamma § 11, naapertorlugit, tak. Atuarfik pillugu Inatsisartut inatsisaat nr. 8, 21. maj 2002-meersoq, Inatsisartut peqqussutaatigut nr. 7-ikkut, 7. maj 2007-imeersukkut allanngortinneqartoq.

Aalajangersakkani taakkunanani periarfissinneqarpoq Naalackersuisut erseqqinnerusumik aalajangersagaat tunngavigalugit atuartunut atuartitaasussaajunnaareersunut efterskolini pilersitsisoqarsinnaasoq, aamma Naalackersuisut Danmarkimi efterskolernermut atatillugu aningaasartuutitut tapiissuteqarsinnaasut.

Efterskolit pillugit inatsisit ataatsimoortikkumallugit taamaalillunilu paasiuminernerutikkumallugit inatsisissatut siunnersuut manna aammattaaq Danmarkimi efterskolernermit tapiissutit pillugit kapitalimik ilaqarpoq.

Danmarkimi efterskolernermit tapiissutit ullumikkut aqutarineqarput Danmarkimi efterskolernermit tapiissutit pillugit Namminersornerullutik Oqartussat nalunaarutaat nr. 26, 15. januar 2004-meersoq aqqutigalugu. Nalunaarut taanna inatsisissatut siunnersuutip akuerineqarnerani atuutiinnassaaq.

2. Siunnersuutip pingaarnersai:

Efterskolit pillugit Inatsisartut inatsisissaattut siunnersuut manna arlalitsigut Hujskolit pillugit Inatsisartut peqqussutaannut nr. 9-mut, 21. maj 2002-meersumut assinguvoq. Kalaallit Nunaanni efterskolit pillugit siusinnerusukkut inatsiseqarnikuunngilaq. Inuusuttut efterskolerniartut Danmarkimi efterskolinut innersuuttariaqartarlutik.

Efterskolit pillugit Inatsisartut inatsisissaattut siunnersuummut matumunnga ilaapput atuartitsineq ataatsimoornerlu, tamatigoortumik qaammarsaanissamik pingaarnertut siunnerfeqartut aamma Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfimmit akuerisaasut. Atuartitsineq sallerpaatillugu tamatigoortuussaaq, atuartitsissutit imaluunniit atuartitsissutit qanitariissut ataasiakkaat pingaarnerusumik inissisimasinnaapput, tamatigoortuunissamilli pingaarnertutinneqarsinnaanatik. Efterskolit atuartitsinerat pingaartitatut toqqammavissamik nammineq toqqakkamik aallaaveqassaaq.

Ukioq atuarfiusoq 2008/09 aallarnerfigalugu atuartunut 80-it missaanniittunut Qaartumi Sulisartut Hujskolianni efterskolit atuartitsinissaq pilersaarutaavoq. Aammattaaq Qasigiannugit Kommuniata Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfik suleqatigalugu ukioq atuarfiusoq 2009/10 aallarnerfigalugu efterskolimik pilersitsinissaq pilersaarutigaa. Qasigiannuani efterskolimik pilersitsiniarnerup pisariaqalersippaa efterskolinik imminnut pigisutut ingerlanneqartunik siulersuisunillu qullersaallutik aqunneqartunik pilersitsinissaq siunertaralugu inatsisitigut tunngaviliinissaq.

Inatsisissatut siunnersuutip Kalaallit Nunaanni efterskolinik - atuartitsinermik ataatsimoornermillu neqeroorteqartunik, tamanut qaammarsaanermik pingaarnertut anguniagaqartunik Naalakkersuisunillu akuerisaasunik - pilersitsinissaq inatsitigut tunngavissippaa. Efterskolit ingerlatsinerat namminneq pingaartitatut toqqagaq aallaavigalugu aqqissuunneqassaaq, suliffeqarfittullu imminut pigisutut ingerlanneqassallutik, qullersaallutillu aqutsisuusunik siulersuisoqartarlutik.

Inatsisissatut siunnersuut kapitalinut 6-inut agguagaavoq. Kapitali 1-imi pineqarput efterskolinik nassuiaat siunertaallu. Kapitali 2-miippat ilinniartunngortitsinermut malittarisassat efterskolillu aqunneqarnerat pillugu qitiusumit aalajangersakkat. Kapitali 3-mi Naalakkersuisut efterskolinik akuersinissaat malittarisassiuunneqarpoq. Kapitali 4-mi efterskolinut tapiisarnermi malittarisassat

aalajangersarneqarput. Kapitali 5-imi Kalaallit Nunaata avataani efterskolernerumut tapiissutit malittarisassiuunneqarput. Kiisalu kapitali 6-ip imarivai nakkutilliineq, misileraaneq atuuttuulersitsinerlu pillugit aalajangersakkat assigiinngitsut.

Nutaatut inatsissatut siunnersuummi aalajangersakkat Naalakkersuisut periarfissippaat efterskolinut akuerisaasunut tapiissuteqarnissaannut - aningaasat Inatsisartut Aningaasanut Inatsisaanni aalajangersarneqartut iluanni. Tapiissutit efterskolip ingerlatsineranut ukiumoortumik tunngaviumik tapiissutit tunniunneqassapput. Siunnersuutip aamma periarfissippaa taxameteri malillugu Naalakkersuisut tapiissuteqarsinnaanerit, efterskolip ukiumut ilinniartuisa amerlassusaat kisitsimmik, ukiumoortumik Inatsisartut Aningaasanut Inatsisaanni aalaajangerneqartumik, amerlisarnerat aallaavigalugu, taamatutaaq ilinniartut efterskolimut akiliutissaannik annikillisaatissamik, isertitat aallaavigalugit aalajangerneqartumik, tapiissuteqarnissaq periarfissinneqarpoq. Naalakkersuisut ilinniartut efterskolernerup aallartinnerani, kipitinnerani naammassineranilu angalanerit tapiissuteqassapput. Aammattaaq Naalakkersuisut efterskolit pisortaasa ilinniartitsisuisalu pikkorissarnerit ilinniaqqinnerinullu tapiissuteqarsinnaapput.

3. Aningaasaqarnikkut allaffissornikkullu pisortanut sunniutaasussat:

Kalaallit Nunaanni efterskolimik ingerlatsinerumut Namminersornerullutik Oqartussat nalinginnaasumik tunngaviumik tapiissutaat tassaassapput kr. 5.600.000. Nalinginnaasumik tunngaviumik tapiissutit saniatigut, taxameteri malillugu tapiissutit ilinniartumut ataatsimut sapaatip-akunneranut tassaassapput kr. 525. Kalaallit Nunaanni efterskolernerumut taxameteri malillugu tapiissutinut aningaasartuutissat Inatsisartut 2008-mut Aningaasaqarnerumut Inatsisaanni konto 40.10.12-ip ataani ilaapput.

Ukiumi atuarfiusumi 2008/09-mi angajoqqaat akiliutissaat aalajangiunneqarpoq tassaassasoq ilinniartumut ataatsimut sapaatip-akunneranut kr. 450.

Ukiumi atuarfiusumi 2008/09-mi angajoqqaat akiliutaannik annikillisaanissamut Namminersornerullutik Oqartussat tapiissutissaat 2008-mut Inatsisartut Aningaasaqarnerumut Inatsisaanni konto 40.10.12-ip ataani aalajangiunneqarpoq tassaassasoq sapaatip-akunneranut kr. 281. Ukioq atuarfiusoq 2009/10 aallarnerfigalugu Namminersornerullutik Oqartussat angajoqqaat akiliutissaannik annikillisaanissamut tapiissutaat 2009-mut Inatsisartut Aningaasanut Inatsisaat aqutigalugu pisassaaq, annertussusissaanullu aalajangiisuussallutik angajoqqaat ilinniarnep aallartinnissaa ukiumik marlunnik sioqqullugu isertitarisimasaasa annertussusaat.

Ukiumi atuarfiusumi 2008/09-mi efterskolimi ilinniartumut ataatsimut aningaasartuutaasussat katillugit sapaatip-akunneranut tassaassapput kr. 1.256. Ataatsimut aningaasartuutit tassaapput Namminersornerullutik Oqartussat taxameteri malillugu tapiissutaat tassaasut ilinniartumut ataatsimut sapaatip-akunneranut kr. 525, angajoqqaat ilinniartumut ataatsimut sapaatip-akunneranut akiliutaat tassaasut

kr. 450 kiisalu angajoqqaat akiliutaannik annikillisaanissamut Namminersornerullutik Oqartussat tapiissutaat tassaasut ilinniartumut ataatsimut sapaatip-akunneranut kr. 281. Ataatsimut aningaasartuutit naatsorsorneranni nalinginnaasumik tunngaviusumik tapiissutit kr. 5.600.000-iusut siulianilu eqqaaneqartut ilaangillat, taamatullu ilaangillat ilinniartut illoqarfigisaminniit efterskolimut aamma efterskolimiit illoqarfigisaminnut angalanerinut aningaasartuutit.

Kalaalit Nunaanni efterskolertitsilluni atuartitsinerup piviusungortinnissaanut ukiumi atuarfiusumi ilivitsumi aningaasartuutissat tamarmiusut naatsorsoraanni - Namminersornerullutik Oqartussat nalinginnaasumik tunngaviusumik tapiissutaat ilanngullugit - ukiumi atuarfiusumi 2008/09-mi ima isikkoqassapput:

Nam. Oqart. nalinginnaasumik tunngaviusumik tapiissutaat	kr. 5.600.000
Taxameteri malillugu atuartumut ataatsimut sap. ak.-ni 42-ni	
ilinniartunut 80-inut tapiissutit, sap.ak.-nut kr. 525	kr. 1.764.000
Sap. ak.-nut angajoqqaat akiliutaat kr. 450 ilinniartunut 80-inut	
sap. ak.-ni 42-ni	kr. 1.512.000
Nam. Oqartussat angajoqqaat akiliutaasa	
annikillisinnaannuttapiissutaat sap. ak.-nut kr. 281,	
ilinniartunut 80-inut sap.ak.-ni 42-ni	kr. 944.000
I alt	kr. 9.820.000

Sulisartut Hujskoliani ukiumi atuarfiusumi 2008/09-mi efterskolertitsineq katillugit akeqassaaq kr. 9.820.000.

Efterskolertitsinerup qanoq annertutigisumik Nunatta Karsia sunnerumaarneraa paasiniassagaanni, angajoqqaat akiliutaat 1.512.000 kr-iusut ilanngaattariaqarput, taamatullu Namminersornerullutik Oqartussat angajoqqaat akiliutissaannik annikillisaanissamut tapiissutaat ilinniartumut ataatsimut sapaatip-akunneranut 281 kr-iusoq, atuartunullu 80-inut sapaatip-akunnerini 42-ni akilerneqartussaq ukiumullu 944.000 kr-iusoq ilanngaattariaqarluni. Namminersornerullutik Oqartussat angajoqqaat akiliutissaannik annikillisaanissamut tapiissutaat 2008-mut Inatsisartut Aningaasanut Inatsisaanni konto 40.10.12-imi ilaareerpoq.

Taamaalilluni Nunatta Karsia - tassalu pisortat - ukiumi atuarfiusumi 2008/09-mi 7.364.000 kr-nik aningaasartuuteqartussanngussaaq, inatsissatut siunnersuut Inatsisartuni akuersissutigineqassappat. Aningaasartuutissat taakku 2008-mut Inatsisartut Aningaasanut Inatsisaanni konto 40.01.08-p ataani ilaareerput.

Oqaatsinik Pikkorissarfik aamma Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik siusinnerusukkut isumaqatigiissuteqareerput, Oqaatsinik Pikkorissarfiup Danmarkimi Kalaallit Nunaannilu efterskolernermit aningaasaliissutit aqutarissagai.

Inatsisissatut siunnersuummi siunnersuutaavoq Naalakkersuisut aalajangersinnaagaat, ilinniartunut tapiissutit kommunalbestyrelsimit imaluunniit

Namminersornerullutik Oqartussat ataanni suliffeqarfimmit immineertumit aqutarineqassasut.

4. Inuussutissarsiornermut aningaasaqarnikkut allaffissornikkullu sunniutaasussat:

Inatsisissatut siunnersuut inuussutissarsiornermut aningaasaqarnikkut aamma allaffissornikkut ingerlatsineranut sunniuteqassanngilaq.

5. Avatangiisinut pinngortitamullu sunniutaasussat:

Inatsisissatut siunnersuut avatangiisinut pinngortitamullu sunniuteqassanngilaq.

6. Innuttaasunut sunniutaasussat:

Efterskolit pillugit inatsisissatut siunnersuut inuusuttut amerlanerit ilikkariartornissaat inerikkiartornissaallu periarfississavaa.

7. Sunniutaajunnartut allat:

Naatsorsuutigineqarpoq efterskolertitsineramik pilersitsinerup nassatarissagaa inuit pisariaqartut atuartitsineranut, allaffissornermut efterskolimilu ilinniartunik nakkutilliineranut atorfinitsinnissaat.

-

8. Naalagaaffeqatigiinnermut namminersornerunermullu tunngasut:

Inatsisissatut siunnersuut Naalagaaffeqatigiinnermut namminersornerunermullu sunniuteqanngilaq.

9. Pisortanut kattuffinnullu tusarniaaneq:

KANUKOKA

Naalakkersuisoqarfiit tamarmik

IMAK

SIK

ILIK

GA

NUSAKA

ASG

AK

Horsfeldt & Partners

Ilinniartitaanermut Ministeeriaqarfik

Efterskolit Allatseqarfiat
Oqaatsinik Pikkorissarfik
Inerisaavik
Ilisimatusarfik
Ilinniarfissuaq
Sulisartut Hujskolia
Knud Rasmussenip Hujskolia
KUR
MIPI
PIP
KNAPK
KIK
AVALAK
Statsministeeria
Inatsisilerinermut Allaffik
Inatsisartut Allattoqarfiat, Inatsisilerinermit immikkoortoqarfik
Tusarniaanermi akissutit.

Tusarniaanermi akissutit nalinginnaasumik siunnersuut ataatsimut isigalugu ilalerillutik oqaaseqaataapput. Tusarniaanermi akissutit sapinngisamik annertunerpaamik siunnersuummut ilanngunneqarput. Tulliuttumi oqaaseqaatit pingaarnerit ersersinneqarput. Naalackersuisoqarfiup oqaaseqaatai uingasumik allataapput.

Naalackersuisoqarfiup Inatsisartut efterskolit pillugit inatsisissaattut siunnersuut Statsministeeriaqarfimmu saqqummiuppa. Statsministeeriaqarfiup maluginiarppaa Atuarfik pillugu Inatsisartut peqqussutaanni nr. 1, 6. juni 1997-imeersumi § 10. imm. 5 naapertorlugu ersimmat "Naalackersuisut erseqqinnerusumik aalajangersagaat naapertorlugit atuartunut ukiumikkut atuartitaasussaataitaanermik qaangeereersunut efterskolinik pilersitsisoqarsinnaasoq". Tamanna tunuliaqutaralugu Namminersornerullutik Oqartussat nalilerpassuk efterskoleqarnermut tunngasut tiguneqareersimasut, naliliinerit qulaani pineqartut aallaavigalugit Statsministeeriaqarfik isumaqarpoq, Namminersornerunermut inatsimmi § 4 naapertorlugu oqartussaaffimmik tigusinertut isigisariaqartoq, taamaammallu pineqartumut atatillugu inatsisiliorneq Inatsisartut peqqussutaatigut pinnani Inatsisartut inatsisaatigut pisariaqartoq, tak. Namminersorneruneq pillugu Inatsimmi § 4, imm. 4.

Naalackersuisoqarfiup nalilerppaa efterskolinut tunngasut Meeqqat aturfiat pillugu Inatsisartut peqqussutaata nr. 1, 6. juni 1997-imeersup akuersissutigineqarneratigut oqartussaaffigineqalersut. Inatsisilerinermut allaffiup aammattaaq oqaatigaa, Namminersornerullutik Oqartussat aalajangersinnaagaat, atuartitsinermit tunngatillugu inatsisiliornikkut ingerlatsinikkullu oqartussaaneq, tassunga ilanngullugit atuartunik ukiumikkut atuartitaasussaajunnaareersunik atuartitsineq aamma efterskolinut tunngasut, Namminersornerullutik Oqartussasut nuussasut, tak Namminersorneruneq pillugu inatsimmi § 4, imm. 1, Kalaallit Nunaanni Namminersornerullutik Oqartussat pillugit inatsimmut nr. 577-imi, 29. november

1978-imeersumut ilanngussami pkt. 11-imut sanilliullugu. Pineqartup tigunissaa Inatsisartut inatsisaata akuersissutigineratigut pissaaq.

Taamaalilluni Statsministeeriaqarfik efterskolit pillugit inatsisiliornerup Inatsisartut inatsisissaannut siunnersuutitut ilusilerneqarnera pillugu oqaaseqaateqanngilaq.

Ilinniartitaanermut ministeeriaqarfik siunnersuummut tunngatillugu oqaaseqaateqanngilaq.

Siunnersuummi oqaaseqaatit nalinginnaasut pillugit oqaaseqaatit:

Kalaallit Nunaanni Sulisitsisut Peqatigiiffiata oqaatigaa, efterskolit ataatsimoortumik Nunatta Karsianut sunniuteqarnissaat eqqunngitsoq, angajoqqaat akiliutaasa appartinnissaannut tapiissutit, Nunatta Karsianut sunniutaasussat ataatsimoortut naatsorsornerinut ilaanngimmata.

Tassunga tunngatillugu oqaatigineqassaaq, angajoqqaat akiliutaasa appartinnissaannut tapiissutit naatsorsuineranut ilaareermat. Eqqorpoq - soorlu Kalaallit Nunaanni Sulisitsisut Peqatigiiffiata IMAK-killu tikkuaraat - ilinniartut efterskolit aallartinnerini naammassinerinilu angalaneranut aningaasartuutissat ilaatinneqanngimmata. Taamaaliortoqarpoq tamatumunnga aningaasartuutissat siumoortumik ilisimaneqanngimmata, illoqarfinnut angerlarsimaffiusunut ataasiakkaanut bilitsit akii assigiinngissinnaaqimmata.

Kalaallit Nunaanni Sulisitsisut Peqatigiiffiat isumaqarpoq, angajoqqaat akiliutiviat sapaatip-akunneranut ilinniartumut ataatsimut 731 kr-iusoq, taassumalu assigigaa angajoqqaat annerpaamik qaammammut 3.143,30 kr-inik akiliuteqartarnissaat.

Tamanna eqqunngilaq. Angajoqqaat akiliutaat Namminersornerullutik Oqartussat akiliutit appsarnissaannut tapiissutaat ilaanngullugu ukiumi atuarfiusumi 2008/09-mi sapaatip-akunneranut ilinniartumut ataatsimut 450 kr-ussasoq aalajangiunneqarpoq.

IMAK-kip tikkuarppaa, Nunatta Karsiata qanoq sunnerneqarumaarneranik naatsorsuineq eqqunngitsoq, angajoqqaat akiliutaasa appartinneqarnissaannut tapissutissaq ilanngunneqarsimannngimmat.

Tassunga atatillugu ilisimatitsissutigineqassaaq, ukiumi atuarfiusumi 2008/09-mi angajoqqaat akiliutaasa appartinneqarnissaannut tapiissut ilaatinneqanngimmat, aningaasat pineqartut 2008-mut Inatsisartut Aningaasanut Inatsisaanni konto 40.10.12-mi ilaareermata.

Knud Rasmussenip Hujskoliata tusarusuppaa inatsisissatut siunnersuut manna

Hujskolit pillugit Inatsisartut peqqussutaannut nr. 9, 21. maj 2002-meersumut qanoq sunniuteqarumaarnersoq.

Tassunga tunngatillugu ilisimatitsissutigineqassaaq, inatsisissatut siunnersuut manna hujskolinut sunniuteqassanngimmat, hujskolit efterskolillu tamarmik immikkut ilinniartunut ukiumikkut anguniagaasutigullu assigiinngitsunut saaffiginnittuummata.

Kalaallit Nunaanni Sulisitsisut Peqatigiiffiat isumaqarpoq, nalinginnaasumik atuartsineq § 1, imm. 1-imi qitiutillugu pingaarnerpaatittariaqartoq tulliuullugillu qaammarsaaneq il.il..

Tassunga tunngatillugu Naalackersuisut eqqaassavaat, aalajangersakkani ataasiakkaani oqaasertaliussat tulleriiaarneri siunertarisap pingaarnerniit tulleriiaagaaneratut isigineqassanngimmata.

Aningaasaqarnermut Nunanullu Allanut Naalackersuisoqarfiup inassutigaa piunasaqaatigeqqullugu, ilinniartut oqaatsitigut pisinnaasaasa nukittorsarneqarnissaat efterskolit ilinniartitsinermik neqeroorutaannut ilaassasoq, taamatullu inatsisissatut siunnersuummi oqaaseqaatitaaniluunniit ilanngullugu nassuiartariaqartoq, ilinniartut inerikkiartornerannut tunngatillugu efterskolernerminni sunik ilimagisaqarfigineqarnersut, taakkununga ilaatillugit ilinniagassatigut inuttullu inerikkiartornermut tunngasut.

Tassunga tunngatillugu oqaatigineqassaaq, efterskolit siunertaat oqaatsitigut ilisimasassanut tunngasuinnaanngimmata, taamaammat ilinniartut oqaatsitigut pisinnaasaasa nukittorsarneqarnissaasa immikkoortillugu ilanngunnissaat kissaatigineqanngilaq.

Siunnersuutip kapitalia 1 - nassuiaat siunertarlu - pillugu oqaaseqaatit

Aningaasaqarnermut Nunanullu Allanut Naalackersuisoqarfiup kissaatigaa Kalaallit Nunaanni Danmarkimilu efterskolernerup assigiinngissutai assigiissutaalu nassuiarneqassasut.

Aallaavittut Danmarkimi Kalaallit Nunaannilu efterskolernerit assigiinngissuteqanngillat, kisianni Kalaallit Nunaanni efterskolinik pilersitsinerup siunertaasa ilagaat, tassuunakkut saaffigisat allat neqeroorfigineqarsinnaalernissaat, soorlu inuusuttut oqaatsitigut akimmiffiit pissutigalugit allanilluunniit pissuteqarlutik Danmarkimi efterskolersinnaanngitsut.

Knud Rasmussenip Hujskolia isumaqarpoq § 1-ip ataani ilinniartunik efterskolimeereernerup kingorna ilinniaqqissinnaaneq pillugu ilitsersuisarnissaq

piumasaqaatigisariaqartoq, inuunerlu pillugu nalinginnaasumik paasititsiniaasarnissaq piumasaqaataasariaqartoq.

Tassunga tunngatillugu ilisimatitsissutigineqassaaq efterskolit namminneq pingaartitatigut tunngavissatik ilusilersortussaammatic. Aammattaaq Naalackersuisoqarfiup malugeqqussavaa efterskolit § 1, imm. 4 naapertorlugu pisussaaffigimmassuk, ilinniartunut atuartitaasussaataasunut atuartitsinermik meeqqat atuarfianni nalinginnaasumik piumasaqaataasunut nallersuussinnaasumik atuartitsinissaq, tamatumalu nassatarissammagu ilinniartut ilinniarnermik ilaatut ingerlaqqeriarnissat pillugit pissusissamisuginnartumik ilinniartitaanissaat, kiisalu efterskolit siunertaanneereerpoq efterskolit atuartitsinermik ataatsimoornissamillu neqerooruteqassasoq, ilinniartut inuttut tamakkiisumik inerikkiartornissaat, kiisalu nalinginnaasumik perorsarneqarlutillu ilinniarnissaat siunertarlugu.

IMAK isumaqarpoq, kapitali 1-imi allaqqasariaqaraluartoq ilinniarfiit immikkut atuartitsinermik immikkullu perorsaaniikkut ikiorsiinermik neqeroorsinnaasut.

Tamanna pisariaqartutut isigineqanngilaq, tassami Naalackersuisut § 17 naapertorlugu immikkut atuartitsinermut immikkullu perorsaaniikkut ikiorsiinermut tapiisarnissaq pillugu aalajangersagaliorsinnaapput. Tassaniipportaaq ilinniarfiit atuartitsinermik taamaattumik ikiorsiinernillu neqeroorsinnaanerat pillugu aalajangersagaliornissamut pisinnaatitaaneq.

Efterskolit Allatseqarfiata (Efterskolernes Sekretariat) ernummatigaa efterskolit pisortanit pilersitat namminersortullu akornanni atugassarititaasut assigiinngittuunissaat.

Tassunga atatillugu eqqaaneqassaaq, piumasaqaatit atugassarititaasullu assigiissammata efterskole qanorluunniit pilersinneqarsimagaluarpat.

Aningaasaqarnermut Nunanullu Allanut Naalackersuisoqarfiup siunertamut naapertuuttuosorinngilaa, suliffeqarfik pisortanit pisortallu aningaasaataat kisiisa isumalluutigalugit pilersitaq, suliffeqarfittut imminut pigisutut pilersinneqassappat. Naalackersuisoqarfiup paarlaallugu siunnersuutigaa efterskolit pisortanit ingerlanneqarlutillu pigineqassasut, soorlu qitiusumik ilinniarfiit tamarmik taamaattut.

Tassunga tunngatillugu oqaatigineqassaaq Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup efterskolit pisortanit ingerlanneqarlutillu pigineqarnissaannik inassuteqaat isumaqatiginngimmagu. Erseqqissarneqassaaq efterskolit ilaatigut angajoqqaat akiliutaannit aningaasalersorneqassammata, taamaalillunilu pisortaniinnaq aningaasalersorneqassanatik. Naalackersuisoqarfik isumaqarpoq efterskolit suliffeqarfittut imminut pigisutut pilersittariaqartut, taamaaliornikkullu efterskolit tunngaviusumik atuarfinnut namminersortunut sanilliunneqarlutik, taamaaliornikkut

efterskolit namminneq pingaartitatut tunngavissatik aalajangersinnaammatic. Aammattaaq Naalakkersuisoqarfiup malugeqqussavaa, efterskolit tapisissagunik, piumasaqaatit arlaqartut piviusunngorteqqaartariaqarmatic, tak. Inatsisissatut siunnersuummi kapitali 4.

Kalaallit Nunaanni Sulisitsisut Peqatigiiffiata aamma IMAK-kip kaammatuutigaat oqaatsit "peroriartorneq" aamma "atuartitsineq" "perorsaanermt" "ilinniartitaanermullu" taarsiullugit atorneqassasut.

Tassunga tunngatillugu eqqaaneqassaaq aalajangersagaq siunertatut aalajangersagaammatic, tassanilu erseqqissarneqarmatic efterskole perorsaasuunngitsaq, taamaallaalli ilinniartut nalinginnaasumik perorsagaanerannut peqataasq Danmarkimi efterskolit assigalugit.

IMAK aamma Aningaasaqarnermt Nunanullu Allanut Naalakkersuisoqarfik isumaqarput, efterskolinit piumasaasariaqartoq ilinniartitsinermik meeqqat atuarfianni nalinginnaasumik piumasaqaataasunut nallersuussinnaasumik ilinniartunut neqerooruteqassasut.

Tamanna siunnersuummi § 1, imm. 4-mut ilanngunneqarpoq.

Aningaasaqarnermt Nunanullu Allanut Naalakkersuisoqarfik isumaqarpoq, "Atuarfitsialaap" ilai naapertuuttut imaluunniit pingaartitatut tunngavia inatsisissatut siunnersuummi atortariaqaraluartut, eqqaaneqarluni efterskole tunngavimmigut tassaasq tunngaviumik ilinniartitaanerup nanginnera.

Naalakkersuisoqarfiup oqaatigissavaa efterskolip nammineq pingaartitatut tunngavigisassani aalajangersassammatic, taakkualu "Atuarfitsialaap" pingaartitatut tunngavigisaasa assigisariaqanngilaat. Taamaattorli aamma oqaatigineqassaaq efterskolit siunertaata meeqqat atuarfianni pingaartitatigut tunngavigisai annertuut imarereermatic.

Siunnersuutip kapitalia 2 - ilinniartussanic akuersineq - pillugu oqaaseqaatit

Sulisartut Hujskoliata aamma Knud Rasmussenip Hujskoliata siunnersuutigaa, eqqarsaatigisariaqartoq hujskolip efterskolillu akuleriisillugit allatorluinnarluunniit akuleriisitsilluni ingerlatsisoqarsinnaanerata periarfissinnissaa.

Siunnersuut taama oqaasertaqartillugu ajornaquteqanngilaq suliffeqarfiit imminnut pigisut efterskolinik hujskolinillu ataatsikkut ingerlatsinissaat.

Horsfeldt & Partners-ip aamma Knud Rasmussenip Hujskoliata Naalakkersuisut § 2, imm. 2 malillugu ilinniartussanic tullerriaarinermt malittarisassaliorinnaanermt

periarfissaqarnerat ernummatigaat, isumaqarlutillu Naalakkersuisut taama piginnaatinneqartariaqanngitsut. Paarlaallugu inassutigineqarpoq ilinniartussanik tulleriiarineq, ilinniartunngorumalluni qinnuteqartitsinermi periutsit, tassaasariaqartoq siulersuisut ataasiakkaat suliassaat, tulleriiarinissamut immikkut malittarisassiornikkut.

Naalakkersuisoqarfiup ilisimatitsissutigissavaa, aalajangersakkap taamaallaat Naalakkersuisut periarfissimmagit, efterskolit oqaaseqartereernerisigit, qinnuteqarnermi aamma ilinniartussanik akuersinermi periusissat pillugit malittarisassiornissamut. Taamaalilluni Naalakkersuisut ilinniartussanik tulleriiarinerpiaq oqartussaaffiginngilaat. Aalajangersakkap sallerpaatillugu siunertaraa efterskolit ataasiakkaat ilinniartuisa nunamit tamarmeersuunissaasa qularnaarnissaat.

Horsfeldt & Partners-ip siunnersuutigaa § 6-imut ilanngunneqassasoq, efterskolip pisortaa perorsaannikkut, allaffissornikkut aningaasaqarnikkullu akisussaasuusoq aamma efterskolip ulluinnarni aqunneqarneranik inerisarneranillu isumaginnittuusoq.

Naalakkersuisoqarfiup tamanna siunertamut naapertuuttuursorinngilaa, tassami allaffissornikkut aningaasaqarnikkullu akisussaaffik inaarutaasumik siulersuisuniippoq, taamatullu siulersuisut akisussaaffigaat efterskolip pisariaqartumik inarisarnissaa.

IMAK siunnersuivoq, § 7, imm. 2-mut ilassutitut aalajangersaasoqassasoq, ilinniarfiup pisariaqartitsineq naapertorlugu naammattunik ilinniarsimasunik sulisoqarnissaa, aamma ilinniarfiup sulinini naammaginartumik aningaasaqarnikkut toqqammaveqarluni aallartissinnaassagaa.

Naalakkersuisoqarfiup tamanna pisariaqarsorinngilaa, paasisutissat taakku ilaatigut ileqqoreqqusami ilaatigullu tapiiffigineqarnissamik qinnuteqaammi ersittussaammata.

IMAK ilutigisaanik siunnersuuteqarpoq, nr. 9-mik nutaamik ilanngussisoqassasoq, suliffeqarfiup atorunnaarsinneqarneranut tunngatillugu aalajangersakkamik ilanngussisoqarluni.

Naalakkersuisoqarfiup tamanna pisariaqarsorinngilaa, suliffeqarfimmik atorunnaarsitsinerup tamanna pillugu aningaasaateqarfinnut inatsisit nalinginnaasut maleruaqqusaat malinneqarumaarmata.

Kalaallit Nunaanni Sulisitsisut Peqatigiiffiat isumaqarpoq, naatsorsuuserinermut tunngatillugu malittarisassatigut minnerpaaffiliisoqartariaqartoq, tassuunakkut uppersarsineqarsinnaaqullugu Naalakkersuisut tapiissutaat efterskolit ingerlatsinerannut siunertaasut piviusunngortinnissaannut atorneqartut.

Tassunga tunngatillugu eqqaaneqassaaq, Naalakkersuisut tapiissutinut atatillugu naatsorsuusiortarnermut atuuttunik nalinginnaasunik malittarisassiornikuummata.

Efterskolit Allatseqarfiat (Efterskolernes Sekretariat) isumaqarpoq eqqarsaatigisariaqartoq, Naalakkersuisut ileqqoreqqusaannaanngitsut aammali siulersuisut ulluinnarni suleriaasissaat akuersissutigisassannginneraat. Tamatuma saniatigut Aningaasaqarnermut Nunanullu Allanut Naalakkersuisoqarfik isumaqarpoq, siunnersuummi nassuiartariaqaraluartoq, qanoq iliorluni siulersuisut inuttalersorneqassanersut qanorlu piumasaqaateqarfigineqassanersut.

Naalakkersuisoqarfiup malugeqquaa, pissutsit pineqartut siunertamut naapertuuttutut isigineqanngimmata, tassami efterskolit ataasiakkaat namminneq ulluinnarni aqunneqarnertik aaqqissuuttussavaat, taamaalillunilu aamma ulluinnarni pisortaqarneq, tassungalu atatillugu ulluinnarni suleriaasissat siulersuisullu toqqarneqartarnerat ilannguttussaallugit.

Efterskolit Allatseqarfiat (Efterskolernes Sekretariat) isumaqarpoq, siulersuisut § 6-imi atorfinitsitsisartunngortinneqartariaqartut, isumaqaramik siulersuisutut akisussaaneq siulersuisutullu peqataaneq taamaaliornikkut qaffassarneqassasoq taamaaliornerlu isumaqatigiinnginnernik pinaveersaartitsisinnaasoq.

Naalakkersuisoqarfiup tamanna siunertamut naapertuuttutut isiginngilaa, paarlattuanimmi taamatut aaqqissuussineq siulersuisut ulluinnarnilu pisortaaup akornanni - sulisunut naleqqiullugu - isumaqatigiinnginnernik pilersitsisinnaavoq. Siunertamut naapertuuttuusorineqarpoq ulluinnarni pisortaq - siulersuisunut akisussaalluni - nammineerluni ilinniarfiup sulisuinik atorfinitsitsillunilu soraarsitsisinnaappat.

Siunnersuutip kapitalia 3 - efterskolinik akuersineq - pillugu oqaaseqaatit

Efterskolit Allatseqarfiat (Efterskolernes Sekretariat) allappoq, inatsisissatut siunnersuummi § 7 ima paasillugu, akuersinissamut piumasaqaatit erseqqissarneqartut, kisiannili inatsitigut piumasaqaataanngitsaq Kalaallit Nunaanni efterskolip akuerineqarnissaa, efterskolip piumasaqaataasut piviusunngortikkaluarpagilluunniit.

Efterskolit akuerineqarnissaasa inatsitigut piumasaqaataannginnerat ilumoorpoq, tassami efterskolit akuerineqarnerat pisassaaq pisariaqartitsinerup aningaasaqarnikkullu periarfissat nalilereernerisigut.

Siunnersuutip kapitalia 4 - efterskolinut tapiissutit - pillugu oqaaseqaatit

Kalaallit Nunaanni Sulisitsisut Peqatigiiffiat isumaqarpoq, kapitali 4-p qulequtaani erseqqissaasoqartariaqartoq, ersarissumik saqqummersillugu pineqarmata Kalaallit Nunaanni efterskolit.

Tassunga atatillugu Naalackersuisoqarfiup oqaatigissavaa, siunnersuutip atuuffissaa tassaammat Kalaallit Nunaat, taamaammallu annertunerusumik erseqqissaanissaq pisariaqanngimmat.

Kalaallit Nunaanni Sulisitsisut Peqatigiiffiat isumaqarpoq, aalajangersagaliortoqartariaqartoq kommunit efterskolernermut tapiissuteqarsinnaalersillugit.

Naalackersuisoqarfiup tamanna siunertamut naapertuuttuursorinngilaa, kommunit taamaaliornissamik kissaateqarlutik oqaaseqanngimmata.

Sulisartut Hujskoliata eqqaavaa, sapinggisamik taxameteri malillugu tapiissutit angajoqqaallu akiliutaat pinaveersaartariaqartut, paarlattuanillu efterskolit aningaasaqartinneqartariaqartut ilisimariinngisat amerlavallaat pinaveersaarlugit.

Tassunga atatillugu Naalackersuisoqarfiup ilisimatitsissutigissavaa, efterskolinut taxameteri malillugu tapiissutit ilisimanngivissorneqartussanngimmata, tassami tapiissutit taakku tunniunneqartassapput efterskolit ilinniartuisa amerlassusaat malillugit, taamaattorli annerpaamik efterskolit ilinniartorisinnaasamittut nalunaarutigisaat naapertorlugit. Angajoqqaat akiliutaannut atatillugu oqaatigineqassaaq, angajoqqaat aningaasaqarnikkut ingerlalluartut qitornaasa kisimik efterskolertarnissaannik ernummateqarneq, annertunngitsutut isigisariaqarmat, tassami Inatsisartut inatsisissaattut siunnersuummi matumani aalajangersagaqarmat, ilinniartut efterskolernerannut akiliutissat isertitat malillugit appartinneqarsinnaanerannut tapiissuteqartarnissamik.

Sulisartut Hujskoliata aammattaaq eqqaavaa, sapinggisamik angajoqqaat akiliutaat pinaveersaartariaqartoq, sissuertariaqartorlu taamaallaat ilaqutariit aningaasarissaartut qitornaasa kisimik efterskolertalinnginnissaat. Aammattaaq eqqaaneqarpoq Namminersorerullutik Oqartussat - angajoqqaat akiliuteqartassappata - akiliutissaraluanut akerneqanngitsunut qularnaveeqqusiisariaqartut.

Isertitat aallaavigalugit akiliutissat aalajangerneqartarnerisigut pinaveersaarniarneqarpoq, ilaqutariit aningaasarissaartut meeraasa kisimik efterskolertannginnissaat. Akiligassat qularnaveeqquserneqarnissaat siunertamut naapertuuttuunngitsutut isigineqarpoq, taamaaliornikkut angajoqqaat meeqqamik efterskolernerinut akisussaaffiigaassammata, aamma taamatut aqqissuussinerup nassatareriaannaammagu amerlavallaat akiliiumajunnaarnerat. Aammattaaq ilinniartunut Danmarkimi efterskolertunut atatillugu taammatut aqqissuussisoqarnikuunngilaq.

Horsfeldt & Partnersip tikkuarpaa taxameteri malillugu tapiissutit angajoqqaallu akiliutaat isiginiartariaqartut ilinniartut sapaatip-akunnerisa naanerini feerianilu angerlarsinnaannginnerinut naleqqiullugit, tamatuma nassatarimmagu efterskolit aningaasartuuteqarnerusarnerat, perorsaanermut atasumik najuuttariaqarnerit, nerisaqartitsineq aamma atortut nalinginnaasumik nungullajaarneruneri/asferfallatsaalineruneri nassatarisarlugit. Knud Rasmussenip Hujskoliata tamannarpiaq aamma tikkuarpaat, aamma Danmarkimi Kalaallillu Nunaanni kulturikkut assigiinngissutit tikkuarlugit annermillu Kalaallit Nunaanni efterskolinut atatillugu kulturikkut misilittagaqannginneq tikkuarlugu.

Naalackersuisoqarfiup ilisimatitsissutigissavaa siunnersuummi pissutsit pineqartut eqqarsaatigineqareermata taxameteri malillugu tapiissutit angajoqqaallu akiliutaat nalilersorneqarmata.

Efterskolit Allatseqarfiat (Efterskolernes Sekretariat) isumaqarpoq, § 9-mi aalajangersagaqartariaqartoq ukioq naatsorsuuseriffik naatsorsuutillu tunniunneqarnissaannut piffissaliussaq pillugit, taamatullu ilinniarfiup naatsorsuutaasa kukkunersiortarnerannut tunngatillugu.

Naalackersuisoqarfiup ilisimatitsissutigissavaa Namminersornerullutik Oqartussat naatsorsuuserinermut malittarisassaasut nalinginnaasut maleruarneqassammata.

IMAK isumaqarpoq § 10, nr. 1 aamma 2 taarsertariaqartut imaalersillugit: "Pisortanut, pisortat tulliinu ilinniartitsisunullu akissarsiaritit atorfinititaanermilu atugassarititaasut Naalackersuisut isumaqatigiissutaat aalajangersagaalluunniit malissavaat, soraarnerussutisiaqarnermut tunngasut ilanngullugit". Aammattaaq Aningaasaqarnermut Nunanullu Allanut Naalackersuisoqarfik siunnersuuteqarpoq, efterskolit qitiusumik ilinniarfittut (brancheskolitut) ingerlanneqassasut, tassuunakkut Naalackersuisut isumaqatigiinniarsinnaatitaaneq tigussammassuk.

Tassunga atatillugu Naalackersuisoqarfiup oqaatigissavaa, aalajangersakkap siunertarimmagu, efterskolit suliffeqarfittut imminnut pigisutut isumaqatiginiagassanut naapertuuttunut namminneerlutik isumaqatigiissuteqarniarnissamut periarfissaqarnissaat.

Aammattaaq IMAK isumaqarpoq § 10, nr. 4-mi Naalackersuisut ilikkagassatut anguniagassanik akuersinissaat piunarsaatit ilannguttariaqartoq.

Tassunga tunngatillugu Naalackersuisoqarfiup eqqaassavaa, efterskolit suliffeqarfittut imminnut pigisutut ilikkagassatut anguniagassat aalajangersartussaammattigik, taamaattorli ilinniartunut suli atuartaasussaataasunut atatillugu piunarsaatit atuartaasut nalinginnaasumik meeqqat atuarfianni piunarsaatit nallersuussinnaasasooq.

KANUKOKA-p ernumanartippaa tapiissutit annertussusaasa ukiumoortumik aalajangiunneqartarnissaat, tassami kattuffik isumaqarpoq, taamanna efterskolimut nalorninartunik nassataqassasoq, piffissamullu ungasinnerusumut pilersaarusiortarnissaq ajornakusoortilersinnaagaa.

Naalackersuisoqarfiup tamanna ernumanartutut isiginngilaa. Piffissaq ungasinnerusoq eqqarsaatigalugu pilersaarusiortermi imaassinnaavoq ilaatigut akimmiffiusinnaasoq, kisiannili tamannarpiaq pissutigalugu ilimagisariaqarpoq tapiissutit ukiumiit ukiumut annertuumik allannguuteqartannginnissaat. Taamaattorli tapiissutit annertussusaat aalajangerneqartartussaassapput qaqugukkulluunniit sillimmatigisat taakkualu ukiumoortumik aningaasanut inatsisitigut pingaarnersiorneri aallaavigalugit.

Sulisartut Hujskoliata § 13 naapertorlugu taxameteri malillugu tapiissutit - ukiup atuarfiusup siuliani ilinniartut amerlassusaat naapertorlugit naatsorsorneqartartussat - agguaanneranni annertunerusumik eqaassuseqarnissaq kissaatigaa.

Tassunga atatillugu Naalackersuisoqarfiup malugeqqussavaa, Naalackersuisut siunnersuummi § 13, imm. 4 naapertorlugu periarfissaqarmata, efterskolinut tapiissutit naatsorsorneqartarnerat, tunniunneqartarnerat aqutarinerallu pillugit - tassunga ilanngullugit ukiumut ilinniartut sapaatip-akunnerisalu atuartitsiviit naammassineqartut ikinneruneranni tapiissutit annikillisinneqarsinnaanerat - aalajangersagaliornissamut.

Kalaallit Nunaanni Sulisitsisut Peqatigiiffiat aamma IMAK isumaqarput efterskolit Kalaallit Nunaannut attuumassuteqartuunissaat piumasaasariaqartoq, tassuunakkut Naalackersuisunit qularnaarneqaqqullugu efterskolinut akuerisaasunut tapiissutit Kalaallit Nunaanniiginnarlutillu Kalaallit Nunaanni atorneqarnissaat.

Naalackersuisoqarfiup tassunga atatillugu eqqaassavaa efterskolit sumiiffinnut atasiakkaanut pituttugaammata sumiiffinni ataasiakkaani suliniuteqarneq aallaavigalugu angajoqqaallu nunatsinniittut tunuliaqutaralugit. Taamaammat tapiissutit Kalaallit Nunaanniiginnannginnissaat ernummatigissallugu pissuteqarpassinngilaq.

Kalaallit Nunaanni Sulisitsisut Peqatigiiffiata ernummatigaa txameteri malillugu tapiissutinik aalajangiisarneq tamannalu annerpaaffeqassanersoq.

Naalackersuisoqarfiup tassunga tunngatillugu oqaatigissavaa taxameteri malillugu tapiissutit ilinniartullu amerlassusaat imminnut atammata, taamaalillunilu ukiut tamaasa tapiissutit annertussusaannut apeqqutaassammat ukiumi aningaasaliiffiusumi efterskolimi inissat amerlassusissaat.

Kalaallit Nunaanni Sulisitsisut Peqatigiiffiata ernummatigaa, Naalakkersuisut isertitat malillugit ilinniartunut tamanut tapiissuteqaqquneqarsinnaanerit, tassami Kalaallit Nunaannut attuumassuteqarnissaq piumasaqaataangimmat.

Naalakkersuisoqarfiup eqqaassavaa, Kalaallit Nunaannut attuumassuteqarnissaq erseqqinnerusumik nassuiarneqangimmat, tassami assersuutigalugu Danmarkimi ilinniartut ataasiakkaat Kalaallit Nunaanni efterskolersinnaanissaat periarfissikkumaneqarpoq, soorlu ilinniartut kalaallit Danmarkimi efterskolernissaminut periarfissaqartut. Taamaammat Kalaallit Nunaannut attuumassuteqarnissaq piumasarineqangilaq.

Kalaallit Nunaanni Sulisitsisut Peqatigiiffiat aamma SIK isumaqarput, tapiissuteqarnermi angajoqqaat malunnaatilimmik isertitamikkut allangortoorsinnaanerit sillimaffigisariaqartoq.

Siunnersuut taanna inatsisissatut siunnersuummut ilanngunneqarpoq.

Kalaallit Nunaanni Sulisitsisut Peqatigiiffiat aamma IMAK siunnersuippat, § 15-imi allasimasariaqaraluartoq Naalakkersuisut angerlarsimaffiup efterskolillu akornanni juullikkunilu angalanernut akiliuteqassasut.

Naalakkersuisoqarfiup eqqaassavaa, siunnersuut allangortinneqarmat, Naalakkersuisut ilinniartunut aallartinneranni, ilinniarnerminnik kipititsineranni naammassinerannilu angalanernut aningaasartuutit akilertussanngorlugit taamatullu qanigisat perulunneranni toqunerannilu angalanernut aningaasartuutit akilissallugit. Juullikkunni angalanernut atatillugu Naalakkersuisut siunnersuutigaat, periuseq maannamut atuuttoq attatiinnarneqassasoq, taamaalillunilu ilinniartut juullikkunni angalanerminni akiliunneqartassanngitsut – tamannalu assigiimmik Danmarkimi Kalaallillu Nunaanni efterskolertunut atuutissasoq.

Sulisartut Hujskoliata tikkuarpaa § 15-imut qanigisat toquneranni angalanerit ilannguttariaqartut. *Tamanna siunnersuummut ilanngunneqarpoq.*

IMAK-kip qularnaarusuppaa, aalajangersakkap nassatarissanngikkaa aningaasat meeqqat atuarfiannut atugassat sunnerneqarnerat. Knud Rasmussenip Hujskoliata apeqquserpaa § 16-ip nassatarisaanik suut anguneqarumaarnersut.

Efterskolini sulisut ilinniaqqinnerinut ingerlaqqiffiusumillu ilinniarnerinut aningaasanik immikkoorsineq ukiumoortumik aningaasanut inatsitigut pisassaaq.

Horsfeldt & Partners isumaqarpoq, § 16, imm. 1-imut teknikkikkut allaffissornikkullu sulisut sulisullu allat ilannguttariaqartut, aamma imm. 1-imi

taaneqartunut ilisarititsilluni ilinniaqqilluni ingerlatsinissanut tapiisoqarnissaa pisussaaffiusariaqartoq.

Tassunga tunngatillugu Naalackersuisoqarfiup eqqaassavaa, siunertaanngimmat efterskolini sulisunut assigiinngitsunut pikkorissartitsinernut ilinniaqqinnernullu siumoortumik aalajangereersimasunut Naalackersuisut tapiisarnissaat. Taamaammatt Naalackersuisut siunnersuutigaat efterskolit atuarfiit namminersortut assigalugit Inerisaaviup Ilinniarfissuullu pikkorissartitsinerinut qinnuteqarnissamut periarfissaqassasut.

Aammattaaq Horsfeldt & Partners-ip siunnersuutigaa efterskolit immikkut atuartitsiffiusut pillugit nutaamik aalajangersagaliortoqassasoq, taanna malillugu efterskolit immikkut saaffiginnittut pilersinneqarsinnaalissapput efterskolinullu nalinginnarnut naleqqiullutik immikkut tapiiffigineqarsinnaallutik.

Tassunga atatillugu eqqaaneqassaaq, Ilinniartitaanermut Naalackersuisoqarfiup Ilaqutariinnut Peqqinnissamullu Naalackersuisoqarfik suleqatigalugu ajornartorsiut eqqartorsimammasuk, aamma suleqatigiissitanik pilersitsisoqarnikuummat, inuit qulaani pineqartut pitsaannerusunik neqeroorfigineqarsinnaanissaat siunertaralugu.

Horsfeldt & Partners-ip aammattaaq inassutigaa, immikkut atuartitsinermut immikkullu perorsaaniikkut ikiorsiineranut tapiissutit aalajangersaaffigineqarnissaasa tungaannut, Naalackersuisut efterskolit tapiiffigisassagaat, ilinniartup meeqqat atuarfiani ukioq kingulleq angajullerni atuarnermi tapiissutigisimasaasa annertoqqataanik.

Tamanna siunertamut naapertuuttutut isigineqangilaq.

Knud Rasmussenip Hujskoliata kissaatigaa aningaasat ukiumi aningaasaliiffiusumi atunngitsut ukiup tullianut nuunneqartassasut, aningaasaliissutaasunut sunniuteqanngitsumik.

Tamanna siunnersuummi § 18, imm. 2-mut ilanngunneqareerpoq.

Inatsisartut Allattoqarfianni inatsisilerinermut immikkoortup siunnersuummi § 18, imm. 2 oqaaseqarfigaa, tassanilu ujarlorlugit siunnersuummi aningaasaliissutit atorneqanngitsut ukiup naatsorsuiffiup tullianut nuunneqarsinnaanissaannut periarfissiinerup tunuliaqutarisai..

Naalackersuisoqarfiup erseqqissassavaa, efterskolit - tunngaviusumik atuarfiit imminnut pigisut assigalugit - sinneqartoorutimik ukiup naatsorsuuseriffiusup tullianut ileqqaarnissaq periarfissarisariaqaraat. Taamaaliornikkut efterskolit namminneerlutik katersisinnaapput, assersuutigalugu atuartitsinermi atortussanik, atortunik pisattanillu ukiumi aningaasaliiffiusumi matussuserneqarsinnaanngitsunik

pisinissaminnut. Taamaattoq erseqqissarneqassaaq tapiissuteqarnermut piunasaqaataammatt, atuartitsineq tapiiffigineqartoq naammassineqassasoq malittarisassat atuuttut naapertorlugit, aamma ilinniartut tapiiffigineqartut amerlassusaat naapertorlugit, taamatuttaaq efterskolit akuerisaassagunik sinneqartoorutimik qanoq atornissaat nassuiartussaammassuk, akuersissullu tunuartinneqarsinnaammatt efterskolip § 7, imm. 1-imi piunasaqaatit naammassisinnaajunnaarpagit. Kiisalu tapiiffigineqarnissamut piunasaqaataavoq, efterskolit sammisassanut pilersaarutaat Naalakkersuisunit akuerineqarsimassasoq, tak. § 10, nr. 4.

KANUKOKA-p malugeqquaa, sumiiffinni ataasiakkaani Siunnersuisarfiit (PPR) kommunimi efterskoliliortoqarpatt suliaasaqarnerulissasut, tamannalu Naalakkersuisut § 16 naapertorlugu malittarisassiorneranni ilanngullugu eqqarsaatigisariaqartoq. KANUKOKA-p tamanna pillugu siunissami suleqatigiinnissaq peqataaffigerusuppa.

Naalakkersuisoqarfiup ilisimatitsissutgissavaa, tamanna pillugu suleqatigiinnissaq siunertaammatt.

Inatsisartut Allattoqarfiani inatsisilerinermut immikkoortup maluginiarpaa inatsisissatut siunnersuutip Kalaallit Nunaanni avataanilu efterskolernermut tapiisarnerit pillugit malittarisassai equngassuteqartut. Taamaalilluni inatsisissatut siunnersuutip §§ 14 aamma 15-iani Naalakkersuisut Kalaallit Nunaanni efterskolernermut tapiisarneri pillugit pingaarnerusutigut malittarisassanik aalajangersaasoqarpoq, kisiannili Kalaallit Nunaata avataani efterskolernermut atatillugu Naalakkersuisut tamakkiisumik malittarisassiorsinnaatitaallutik, tak. § 20, imm. 2.

Oqaaseqaammatt tassunga atatillugu § 20 ilaneqarpoq.

Siunnersuutip kapitalia 6 – aalajangersakkat assigiinngitsut – pillugit oqaaseqaatit

Kalaallit Nunaanni Sulisitsisut Peqatigiiffiat isumaqarpoq, § 21-mi nakkutilliineq taaneqartoq qanoq kinguneqassanersoq erseqqissartariaqartoq.

Naalakkersuisoqarfiup erseqqissassavaa, efterskolit ulluinnarni ingerlatsinerannik aqutsineq siulersuisunit pisortamillu ingerlanneqassammatt, tak. §§ 4, 5 aamma 6, aammattaaq tapiissuteqartoqassappatt piunasaqaatit piviusunnagortinneqarsimasariaqarput, tak. § 9. Aammattaaq § 1, imm. 4-mi aalajangersagaqarpoq, efterskolit ilinniartunik suli atuartitaasussaataasunik atuartitsissasut meeqqat atuarfianni nalinginnaasumik piunasaqaataasunut naapertuuttumik. Aalajangersakkat taakku Naalakkersuisut efterskolinik nakkutilliinerannut tunngaviussapput, tak. § 21.

Kalaallit Nunaanni Sulisitsisut Peqatigiiffiata aamma IMAK-kip ernummatigaat, efterskolit misiliilluni pilersitat inatsitigut inissisimanerat, siunertamullu naapertuutinningsutut isigalugu siunnersuut aatsaat 1. januar 2009-miit atuutuulissappat.

Naalakkersuisoqarfiup oqaatigissavaa ukiumi atuarfiusumi 2008/2009-mi efterskolit atuartitsineq hujskolit ingerlassaat, misileraalluni atuartitsinertut ingerlanneqarmat, Naalakkersuisut, Sulisartut Hujskoliata aamma Knud Rasmussenip Hujskoliata akornanni isumaqatigiinnerup kingorna, taamaalillunilu malittarisassat hujskolinut atuuttut ataanni inissisimammata.

Horsfeldt & Partners-ip eqqaavaa, inatsissap oqaasertaasigut isummerfigineqarsimangimmat, ilinniartuq assersuutigalugu Kalaallit Nunaanni efterskolereeruni Danmarkimi efterskolernissaminut qinnuteqarlunilu tapiiffigineqarsinnaassanersoq.

Tassunga tunngatillugu eqqaaneqassaaq, pissutsit pineqartut inatsisip pingaarnertut atuuffissaanut - tassalu Kalaallit Nunaanni efterskolernermut - ilaangimmata, taamaattorli pineqartut pillugit Naalakkersuisut malittarisassaliorsinnaammata inatsisissatut siunnersuummi § 20, imm. 2 naapertorlugu.

Horsfeldt & Partners-ip aammattaaq inerikkiartormikkut innarluutillit Danmarkimi efterskolissatillutik alakkaasinnaanerinut tunngasut oqaaseqaateqarfigai.

Tamannattaaq Naalakkersuisut § 20, imm. 2 naapertorlugu malittarisassiuussinnaasaasa ilagaat.

Kiisalu Horsfeldt & Partners-ip eqqaavaa, ilaqutariit meeqqaminnik arlalinnik marlulissanilluunniit ataatsikkut ukiulluunniit malitsiinnarlugit efterskolertuutillit, meeqqap aappaanut 50 %-imik annertusisamik tapiiffigineqartariaqaraluartut.

Pineqartoq Aningaasanut Inatsisikkut aaqqiivigineqassaaq.

Inatsisissatut siunnersuutip aalajangersagaanut ataasiakkaanut oqaaseqaatit

§ 1-imut

Aalajangersakkami ersarissarneqarpoq efterskolit ingerlatsinerannut siunertaammat atuartitsinermik ataatsimooqatigiinnermillu neqerooruteqarnissaaq, tamatigoortumik qaammarsaanissaaq demokratiskiusumillu peroriartornissaaq pingaarnertut

anguniagaralugit. Atuartitsineq tamatigoortuussaaq. Imaappoq atuartitsissutini anguniakkat atuartitsinerup tamatigoortumik imaqarnissaanut naleqqiullugit pingaarninngussanngitsut. Efterskole suliffeqarfiuvoq imminut pigisoq, atuartut tamarmiusumik inuttut inerikkiartornissaannik, inersimasunngoriartornerannik, nalinginnaasumik perorsagaanissaannik ilinniarnissaannillu suliaqartoq, pingaartitatut tunngaviit efterskolip siulersuisuisa namminneq toqqagaat aallaavigalugit.

Aammattaaq Kalaallit Nunaanni efterskolit aammattaaq siunertaraat inunnt, Danmarkimi efterskolinit neqeroorfigineqartartunit allaanernut saaffiginninnissaq. Imaappoq ilinniartunut, Danmarkimi efterskolertilluni tapiiffigineqarnissamut naammattumik qallunaat oqaasiinik piginnaasaqanngitsunut, allamilluunniit peqquteqarlutik Kalaallit Nunaanniiginnarusuttunut saaffiginnikkamik.

Imm. 1-imut

Aalajangersakkami tassani aalajangerneqarpoq Kalaallit Nunaanni efterskolit tassaasut suliffeqarfiit imminnut pigisut, atuartitsinermik ataatsimooqatigiinnermillu neqerooruteqarfiusut. Ilinniartut efterskolimi najugaqarlutillu atuartinneqartussaammata, efterskolit ilinniarfinnut allanut naleqqiullugit nallernissaqanngitsumik periarfissaqarput, ilinniartut inuttut tamakkiisumik inerikkiartortinnissaat siunertaralugu sulinissaminnut. Taamaammat efterskolit atuartitsinermi ataatsimooqatigiinnermilu ilinniartup demokratiskiusumik peroriartornissaata ineriartornissaatalu sulissutiginnissaa periarfissaqarfigilluarpaat, najukkami, nunagisami nunarsuarlu tamakkerlugu isiginneriaatsit aallaavigalugit.

Demokratiskiusumik peroriartornerup siunertaraa ilinniartup tamakkiisumik inuttut inerikkiartornissaannik inersimasunngoriartorneranillu ikorfartuinissaq, sapinngisarlu naapertorlugu ilinniartup nammineq ilisimasai misilittagaalu aamma angajoqqaat perorsaanerat siusinnerusukkut angerlarsimaffimmi pisimasooq ataqatigiisilissallugit. Demokratiskiusumik peroriartornerup aammattaaq efterskolimi atuartitsinerup ilinniartullu atuarfimmit, angerlarsimaffimmit najukkaminillu ilisimariigaasa ataqatigiisilernissaat sapinngisamik annertunerpaamik ikorfartussavaa.

Imm. 2-mut

Efterskolip ilinniartitsinermini atuartitsissutini ataasiakkaanik imaluunniit atuartitsissutini qanitariissunik ilinniartitsineq pingaartissinnaavaa. Kisiannili ilinniartitsinerup tamatigoortumik iluseqarnissaa efterskolip ingerlatsinerani tamarmi annertuumik pingaartinneqassaaq. Taamaammat ilinniartitsineq ataatsimoornerillu tamarmik neqeroorutigineqassapput ilinniartup silappaarisutsimigut, timikkut, inooqatigiinnikkut misigissutsimigullu ineriartornissaannik annertusaanissaq siunertaralugu. Ilinniartitsinermi tamarmi ilinniartup ineriartornissamut periarfissai piginnaasaalu pingaartillugit ilaatinneqassapput.

Assersuutigalugu atuartitsineq taamaallaat atuartitsissutini ilisimasariaqartunik tunngaveqassanngilaq, inooqatigiisitsikkut misigissutsitigullu piginnaasat minillugit. Efterskolimi ilinniartitsineq pitsaasoq tassaavoq ilinniartitsineq

ilinniartumi ilikkariartormik ineriartormillu pilersitsisoq, aamma ilinniartup silappaarissutsikkut, inooqatigiinnikkut, timikkut misigissutsitigullu piginnaasaanut atassusiisoq. Ilutigisaanik tamatigoortumik ilinniartitsineq ilinniartitsinermi ersarississaaq sammisat mernguernartut, timersuutit eqqumiitsuliornermullu attuumasut attaveqatigiinnermi aaqqissuussaasumik naqisimaneqanngitsumillu aaqqissuussinerit aqutigalugit.

Tamatigoortumik perorsaaneq ilinniartitsinerlu, atuartitsinerup tamatigoortumik peroriartortitsineranik aamma taaneqartartoq, amerlanertigut tassaasarpoq ilinniartitsinerup ilaa tigussaasuunngitsoq. Ilinniartitsinerup ilaa tigussaasuunngitsoq tamanna, atuarfinni suliaqartuusut ilaannit taaneqartarpoq "ilikkagassatut pilersaarut ersinngitsoq", tassami ilinniartitsinerup ilaa tamanna nalinginnaasumik ilinniartunut ilinniartitsisunullu takussaasuusanngilaq.

Kisianni efterskolip ilinniartitsinerani ilinniartitsinerup ilaa taanna ersarissunngortinneqassaaq, efterskolit ataasiakkaat namminneq toqqakkaminnik pingaartitatut tunngavigisaata ersarissumik oqaasertalerneratigut. Efterskolip nammineq toqqakkaminik pingaartitatut tungavissaminik oqaasertalersuineratigut siunertaanngilaq, ilinniartut efterskolip pingaartitai namminneq pingaartitamittut ineriartortissagaat. Efterskolip pingaartitaasa ersarissunngortinnerisigut siunertaavoq ilinniartut namminneerlutik pingaartitaminnik oqariartuuteqarsinnaalernissaat, namminneerlutik eqqarsaatersuutitik naapertorlugit.

Efterskolip nammineq toqqakkaminik pingaartitatigut tunngavissaminik oqaasertaliinera ilutigalugu, ilinniartitsinerup tigussaasuunngitsortaamik - imaluunniit "ilikkagassatut pilersaarutininik ersinngitsunik" - ersarissanissamat pingaarutilimmik sakkussaqartoq. Ilutigisaanillu efterskolip pingaartitatigut tunngavigisaa ataatsimoornermi aaqqissuussanik namminerlu toqqakkanik sammisaqarnissamat tunngavissiivoq, efterskolip anguniagaanut pingaartitaanullu naapertuuttumik. Pingaartitatigut tunngaviit ersarissakkat demokratiskiusumik peroriartormerup - efterskolip ilinniartitsinerata ataatsimooqatigiinnerullu siuarsagassaasa ilagisaata - pingaaruteqarluinnartumik toqqammavigai.

Ilinniartut angajoqqaallu efterskolimut qinnuteqartoqannginnerani nalunngeriissavaat pingaartitat suut ilinniartitsinermut ataatsimooqatigiinnermullu tunngaviunersut. Ilinniartut angajoqqaallu ataasiakkaat efterskolip pingaartitatigut tunngavii isumaqatiginngikkaluarpatigilluunniit, efterskolip demokratiskiusumik tunngaviisa qularnaassavaat ilinniartitsinerup ataatsimooqatigiinnerullu ilinniartunik tamanik inissaqartitsinissaaq, pingaartitatigut tunngaviit isumaqatigineqanngikkaluarpataluunniit. Efterskolip pingaartitatigut tunngaviisa ersarissuunerisigut ilinniartut, ilinniartitsisut angajoqqaallu periarfissinneqassapput efterskolip pingaartitai pillugit oqallinnissamat, tassuunakkullu nammineq pingaartitat oqariartuutiginissaat periarfissinneqassalluni, demokratiskiusumik peroriartormermi tunngaviit naapertorlugit.

Imm. 3-mut

Efterskole akuerisaassaguni taamaalillunilu Namminersornerullutik Oqartussanit tapiissutinik qinnuteqarsinnaalissaguni Naalakkersuisunit - imaluunniit ulluinnarni Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit - akuerisaasariaqarpoq § 7, imm. 1-imi aalajangersakkat naapertorlugit.

Imm. 4-mut

Aalajangersakkami efterskolit atuartitsinerisa pingaarnerusutigut sinaakutissaat aalajangersarneqarput. Aalajangersakkami efterskolit pisinnaatinneqarput ilinniartitsinermik neqeroornissaannut pisussaaffilerneqarlutillu atuartitsinerup meeqqat atuarfiani nalinginnaasumik piumasaqaataasunut nallersuussinnaanissaanik. Aalajangersagaq ima paasineqassaaq efterskolit atuartitsissutit qanitariissut – meeqqat atuarfianni fagit pissusissamisuginnartumik aguuaanneqarfigisinnaasaasa - iluanni neqerooruteqassasut. Piumasaanngilaq meeqqat atuarfiani atuartitsissutaasartut tamarmik neqeroorutaanissaat.

Imm. 5-imut

Aalajangersakkami aalajangerneqarpoq ilinniartut atuartitaasussaatitaasut meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut piareersaataasumik atuartitsinermik neqeroorfigineqassasut. Aalajangersakkap qularnaarniarpaq efterskolini atuartitsinerup pitsaassusaata meeqqat atuarfiannisut attatiinnarneqarnissaa, efterskolit atuartitsinermik namminneq ilusilersuisinnaanerannik killilersunngikkaluarlugit.

Imm. 6-imut

Aalajangersakkami aalajangerneqarpoq ilinniartut ukiumikkut atuartitaasussaatitaajunnaareersut meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut innersuunneqarsinnaasut. Aalajangersakkap ilinniartut ukiumikkut atuartitaasussaatitaajunnaareersut periarfissippai – pisussaaffilinnngikkaluarlugit – meeqqat atuarfianni inaarutaasumik nalilertinnissamut misilitsinnissamullu.

Imm. 7-imut

Aalajangersakkami aalajangiunneqarpoq Naalakkersuisut efterskolit pisortaat pisinnaatissagaat, inaarutaasumik naliliinerit misilitsinnerillu pillugit malittarisassat qaqugukkulluunniit meeqqat atuarfiannut atuuttut naapertorlugit naliliinernik misilitsinnernillu ingerlatsisinnaatillugu.

Imm. 8-mut

Aalajangersakkap Naalakkersuisut pisinnaatippaat efterskolip inaarutaasumik naliliinermut misilitsinnermullu malittarisassat meeqqat atuarfiannut qaqugukkulluunniit atuuttut naapertorlugit ingerlatsisinnaanerannik atorunnaarsitsinissamut, efterskolip malittarisassat qaqugukkulluunniit meeqqat

atuarfianni inaarutaasumik naliliinermut misilitsinnernullu atuuttut maleruannippagit. Aalajangersakkakut qularnaarniarneqarpoq naliliinerit misilitsinnerillu ingerlanneqartut qaffasissusaasa appartinneqannginnissaat.

§ 2-mut

Imm. 1-imut

Aalajangersakkami tassani aalajangerneqarpoq, efterskolip nammineerluni ilinniartoriniakkani akuerisassagai. Tamanna efterskolip suliffeqarfittut immiut pigisutut pilersinneqarlunilu ingerlanneqarnissaanut naapertuuppoq, tak. § 4.

Imm. 2-mut

Naalackersuisut pisinnaatinneqarput ilinniartussanik qinnuteqartitsinermit akuersinermilu periusissat pillugit malittarisassiornissamut. Tamannali aatsaat pisinnaavoq efterskolit oqaaseqaateqartereernerisigut. Aalajangersakkami siunertarineqarpoq ilinniartut Kalaallit Nunaanniit tamarmeersuunissaasa qularnaarnissaat, aamma ilinniarfimmuut suna akikinnerunersoq apeqquttaatillugu ilinniartortaartoqartannginnissaa anguniarlugu. Taamaattoq "-sinnaapput" atorneratigut tikkuarumaneqarpoq, aallaavittut efterskolit namminneerlutik imm. 1 malillugu ilinniartussaminnik akuersisassasut.

§ 3-mut

Aalajangersakkami aalajangerneqarpoq, efterskolimi ilinniartoq ukiut 8-t naammassillugit atuarsimassasoq imaluunniit 14-inik ukioqalersimassalluni 18-inillu ukioqalereersimassanani. Naalackersuisut aalajangersagaliorsinnaapput, immikkut pisoqartillugu qaqugukku 18-inik ukioqalereersimasut ilinniartut akuerineqarsinnaanersut. Immikkut pisoqartillugu 18-inik ukoqalereersimasunik ilinniartunngortitsisinnaanissamut pisinnaatitsinermut tunuliaqutaavoq, inuusuttut 18-inik ukioqalereersimagaluartut efterskolersinnaanissaannut periarfissiinissamik kissaateqarneq.

§ 4-mut

Aalajangersakkami aalajangerneqarpoq efterskolit - hujskolit assigalugit - suliffeqarfittut immiut pigisutut ingerlanneqassasut. Tamatuma nassataraa efterskolimik aqutsisoqassappat siulersuisunik pilersitsisoqartariaqartoq. Siulersuisut Naalackersuisunut akisussaassapput, ingerlassanut Nunatta Karsianit aningaasaliiffigineqartunut naleqqiullugu. Taamaattoq aalajangersagaq § 6-imi aalajangersakkamut atatillugu isiginiarneqassaaq, tassani ersimmat efterskolip pisortaa tassaasoq perorsaanikkut aamma efterskolip ulluinnarni aqutarineranut akisussaasoq.

Siunnersuutip oqaasertalenera tunngavigalugu ajornaquteqanngilaq assersuutigalugu hujskolip pioreersup efterskolimik ingerlatsisinnaanera.

§ 5-imut

Imm. 1-imut

Aalajangersakkami pineqarput siulersuisut suliassaasa ilaat - efterskolip ingerlatsineranut aamma piffissaq ungasinnerusoq eqqarsaatigalugu ineriartortinnissaanut atatillugu. Siulersuisut efterskolip piffissami qaninnerusumi ungasinnerusumilu ingerlatsinissaanut siulersuisut tunaartarisassaliussapput. Aammattaaq siulersuisut isumagissavaat piffissami aalajangersimasumi - soorlu ukioq atuarfiusoq tamaat - ingerlatassat pilersaarusiorneqarnissaat. Ingerlatassat pilersaarusi Naalackersuisunut akuerisassatut saqqummiunneqassapput. Siulersuisut Naalackersuisunut akisussaaffigaat, ingerlanneqartut § 1-imi siunertaq pillugu aalajangersakkanut naapertuuttuunissaat, taakkununga ilanngullugit ilinniartitsinerup tamatigoortuunissaa, atuartitsinermik ataatsimoorinissamillu neqerooruteqarnissaq, atuartut inuttut tamakkiisumik inerikkiartornissaat, kiisalu nalinginnaasumik perorsarneqarlutillu ilinniarnissaat siunertaralugu tamanut paasisutissiinissamik demokratiilu tunngavigalugu peroriartornissamik pingaarnertut anguniagaqarnissaq, ingerlatsinerullu tamatuma efterskolip pingaartitatur nammineerluni toqqagai tunngavigalugit aqqissuunneqarnissaa, tak. § 1.

Imm. 2-mut

Aalajangersakkami aalajangerneqarpoq siulersuisut kisimik pisortamik atorfinitsitsinissamut soraarsitsinissamullu pisinnaatitaallutillu akisussaasut.

Imm. 3-mut

Aalajangersakkap erseqissarpaa, siulersuisut efterskolimut ileqqoreqqusaliussasut. Siulersuisut Naalackersuisunut ileqqoreqqusap akuersissutiginnissaa inassutigissavaat, tak. § 7, imm. 2. Aammattaaq siulersuisut suliassaraat ulluinnarni suleriaasissioornissaq. Aalajangersakkap taassuma qularnaassavaa, siulersuisut sulinerannut tunngavissiortoqarnissaa, tassunga ilaallutik siulersuisut katitigaanerat ingerlatassaallu allat, tassuunakkut aalajangiinissamut pitsaanerpaanik tunngavissiisoqaqqullugu.

§ 6-imut

Imm. 1-imut

Aalajangersakkami aalajangersarneqarpoq pisortaq tassaasoq efterskolip ingerlatsineranut perorsaanikkut qullersaalluni akisussaasuusoq, taamaalillunilu pisortap siulersuisut aalajangersagaasa piviusunngortinnissaat isumagisassarigaa.

Aammattaaq pisortap pisussaaffigaa, efterskolimi ulluinnarni aqutsinerup allaffissornikkut ingerlatsineq, naatsorsuuserineq kukkunersiuinerlu pillugit malittarisassat atuuttut naapertorlugit ingerlanneqarnissaa, kiisalu aqutsinerup siulersuisut tunaartarisassaliaat naapertorlugit isumagineqarnissaa pisussaaffigaluguttaaq.

Imm. 2-mut

Aalajangersakkami aalajangerneqarpoq, pisortap efterskolimi sulisut sinnerisa atorfinitsinnissaat soraarsinnissaallu akisussaaffigaa. Sulisunik atorfinitsitsineq pissaaq, efterskolip ingerlatsinissaa pillugu ingerlatassatullu pilersaarutit siulersuisut aalajangersagaasa tunaartarisassaliaasalu piviusunngortinneqarnissaat siunertaralugu. Pisortap efterskolimik ulluinnarni aqutsinermigut ilisimalluarnerpaavaa, qanoq iliorluni nukissat pitsaanerpaat suliassat isumaginissaannut atorneqassanersut. Taamaammatt siunertamut naapertuunnerpaavoq pisortap efterskolip sulisui atorfinitsittarpagit, tassuunakkut suliamut tunngasutigut ikorfartoqatigiinneq pitsaanerpaaq pilersinneqaqqullugu.

§ 7-imut

Imm. 1-imut

Aalajangersakkami Naalackersuisut efterskolit akuerinissaannut sinaakktissanik aalajangersaasinnaanerat aalajangersarneqarpoq. Naalackersuisut taamaallaat efterskolit akuerisinnaavaat, efterskolip ileqqoreqqusaa, tak. Imm. 2, Naalackersuisunit akuerineqarsimappat, efterskolilu naapertuuttunik inissaqarlunilu atortoqarpat

"Akuerisinnaavaat"-mik oqaasertaliinikkut, pineqanngilaq akuerisaanissaq inatsisitigut pisinnaatitaaffiusoq, tassami efterskolinik akuersinermut ilaatigut tunngaviusussaapput piunasaqaatit taaneqareersut aamma Aningaasanut Inatsimmi siunertamut aningaasaliussat.

Imm. 2-mut

Aalajangersakkami aalajangerneqarpoq ileqqoreqqusap minnerpaamik suut imarissanerai. Siulersuisut namminneq qulequttat naapertuuttut ileqqoreqqusamut ikkussinnaavaat. Assersuutigalugu siulersuisut suleriaasissaat ileqqoreqqusamut ilanngunneqarsinnaavoq.

Nr. 1-imut

Aalajangerneqarpoq suliffeqarfiup imminut pigisup aqqa ileqqoreqqusami ilanngunneqassasoq.

Nr. 2-mut

Aalajangerneqarpoq efterskolip ileqqoreqqusaani suliffeqarfiup imminut pigisup angerlarsimaffia ilanngunneqassasoq.

Nr. 3-mut

Aalajangerneqarpoq suliffeqarfiup imminut pigisup siunertaa efterskolip ileqqoreqqusaani ersissasoq.

Nr. 4-mut

Aalajangerneqarpoq ileqqoreqqusani ersissasut suliffeqarfiup imminut pigisup pigisaasa pilersinneqarnerminilu imminerisaminik aningaasaataasa annertussusaat.

Nr. 5-imut

Aalajangerneqarpoq pilersitsisoq allalluunniit immikkut pisinnaatitaaffeqarpat iluaqutissaqarluniluunniit tamanna ileqqoreqqusami allassimassasoq.

Nr. 6-imut

Aalajangerneqarpoq siulersuisunut ilaasortat katitigaanerat amerlassusaallu, qanoq toqqarneqartarnerat piffissallu atuuffiisa sivisussusaa ileqqoreqqusami allassimassasoq.

Nr. 7-imut

Aalajangersakkami aalajangerneqarpoq naatsorsuineranut malittarisassat ileqqoreqqusami allassimassasut.

Nr. 8-mut

Aalajangersakkami aalajangerneqarpoq, ileqqoreqqusani allassimassasoq sinneqartoorutit qanoq atorneqassasut.

Imm. 3-mut

Aalajangersakkap erseqqissarpaa, efterskolip siulersuisuisa qaammatisiutit malillugit ukiumi efterskolip aallartiffissaatut pilersaarutaasumi kingusinnerpaamik 1. marts ileqqoreqqusat akuerisaasut Naalackersuisunut nassiutereersimassagaat. Siulersuisut ileqqoreqqusamik ukiup atuarfiusup aallartinnginnerani Naalackersuisunut nassiussinissaannut pissutaavoq, Naalackersuisut qularnaarumammassuk, efterskolip ingerlanneranut aqutsisussamik sulisinnaassuseqartumik siulersuisoqarnera.

§ 8-mut

Imm. 1-imut

Aalajangersakkami aalajangiunneqarpoq, Naalackersuisut efterskolimik akuersissummik atorunnaarsitsisinnaasut, taassuma § 7, imm. 1-imi piunasaqaataasut piviusunngortissinnaajunnaarpagit. Aamma Naalackersuisut akuersissummik atorunnaarsitsisinnaapput efterskolip ilinniartitsinera ingerlassaaluunniit allat § 1-imi siunertatut aalajangersakkanut akerliuppata.

Imm. 2-mut

Naalackersuisut akuersissummik atorunnaarsitsisinnaapput, efterskolip ilinniartitsinera pissutsillu allat § 1-imi siunertatut aalajangersakkanut, tak. § 7, imm. 1, naggatit aappaat, ersarissumik akerliusutut nalilerneqarpara, taamaattorli aatsaat pissutsit efterskolit siunertaannut naapertuutinngitsut aaqqiiviginialugit sakkortunnginnerusunik aaqqiissuteqaqqusilluni peqqusisoqareersimappat. Taamaallilluni aalajangersakkap matuma qularnaarpaa efterskolip siulersuisuisa ilinniartitsinerup pissutsilluunniit allat § 1-imi aalajangersakkanut akerliusut aaqqinniarnissaannut periarfissaqarnissaat, Naalackersuisut akuersissummik atorunnaarsitsilinninneranni.

§ 9-mut

Aalajangersakkami aalajangerneqarpoq, efterskole inatsit manna naapertorlugu tapiiffigineqarsinnaassaguni Naalackersuisunit akuerisaasariaqartoq aamma tapiinissamut piunasaqaatit §§ 10 – 11-miittut piviusunngortissagai.

§ 10-mut

Aalajangersakkami aalajangersarneqarpoq, Naalackersuisut efterskolinut akuerisaasunut tapiissuteqartartut aningaasat Inatsisartut Aningaasanut Inatsisaanni aalajangersarneqartut iluanni (tunngaviumik tapit, taxameteri malillugu tapit, ilinniartut akiliutaannik apparsaanissamut isertitat aallaavigalugit tapit). Ilinniartunut akiliutit appartinnaasut isertitat aallaavigalugit tapiissuteqartarnissamik aalajangersakkap ilaatigut qularnaassavaa, ilaqtariit aningaasarissaartut meeraasa kisimik efterskolertannginnissaat.

Efterskolimut akuerisaasumut tapiisoqartarpoq piunasaqaatit nr. 1 – 4-mi taaneqartut tunngavigalugit.

Nr. 1-imut

Aalajangersakkami aalajangiunneqarpoq pisortamik ilinniartitsisunillu akissarsiaqartitsinerit Naalackersuisut isumaqatigiinniarfigisinnaasaasa iluanni atorfinnut assingusunut malittarisassat naapertorlugit pissasut. Aammattaq aalajangersakkap qularnaassavaa, atorfinitsitsinermi atugarissarititaasut allat allakkatigut isumaqatigiissutigineqarsimanissaat. Aalajangersakkamut siunertaavoq ilaatigut sulisut akissarsianut tunngasutigut atorfininnermilu atugassarititaasutigut allatigut pisinnaatitaaffiisa qularnaarnissaat. § 10, nr. 1-imi taamaallaat efterskolit

pisortaat ilinniartitsisuilu aalajangersaaffigineqarput, aalajangersakkakut siunertarineqarmat efterskolit namminneerlutik isumaqatiginiaqatigisassanik naapertuuttunik isumaqatigiinniarnissaannut periarfissinnissaat.

Nr. 2-mut

Aalajangersakkap qularnaassavaa efterskolip pisortaata ilinniartitsisuisalu naammaginatunik soraarnerussutisiaqarnissaat.

Nr. 3-mut

Siulersuisut isumagissavaat ukiumoortumik nalunaarusiorneq, naatsorsuutit saqqummiunnerinut ilutigitillugu. Aalajangersakkap siunertaraa Naalakkersuisut efterskolimik akueriseqqinnissaminnut pitsaanerpaamik toqqammavissaqarnissaasa qularnaarnissaat.

Nr. 4-mut

Aalajangersakkap aalajangiuppaa, efterskolip ingerlatsinissamut pilersaarutaata Naalakkersuisunit akuerisaanissaa. Aalajangersakkap siunertaraa efterskolit namminneq pingaartitatigut tunngavigisaminnik malinninnerisa qularnaarnissaat.

§ 11-mut

Aalajangersakkami aalajangersarneqarpoq Naalakkersuisut tapiissutaat aalajangiunneqartassasut aningaasaliussat Inatsisartut Aningaasanut Inatsisaanni aalajangiunneqartut iluanni. Efterskolinut tapiissuteqarnissamut piunasaqaataavoq, sapaatip-akunnerini 40-ni tapiiffigineqarsinnaasumik atuartitsisoqassasoq, atuartitsinerlu aaqqissuunneqassasoq efterskolernertut minnerpaamik sapaatip-akunnerinik 40-nik sivilissusilittut, aamma ilinniartitsinerup tapiiffigineqarsinnaasup iluani ukioq kaajallallugu ilinniartut minnerpaamik 24-ussasut.

§ 12-imut

Aalajangersakkami aalajangersarneqarpoq, Naalakkersuisut efterskolinut tamanut ukiumoortumik tunngaviumik tapiissuteqartassasut. Tunngaviumik tapiissutit annertussusaat ukiumoortumik Inatsisartut Aningaasanut Inatsisaanni aalajangersarneqartassaaq.

§ 13-imut

Imm. 1-imut

Aalajangersakkami aalajangersarneqarpoq, Naalakkersuisut efterskolimut taxameteri malillugu tapiissuteqartassasut, efterskolip - ukiumi atuarfusumi Aningaasanut Inatsisip siuliani naammassisumi - ukiumut ilinniartuisa amerlassusaat kisitsimmik, ukiumoortumik Aningaasanut Inatsimmi aalajangerneqartumik, amerlisarnerat aallaavigalugu.

Imm. 2-mut

Aalajangersakkami aalajangersarneqarpoq, efterskolip ukiumut ilinniartui naatsorsorneqassasut tassaatillugit ukiumi ataatsimi sapaatip-akunnerini pikkorissarfiusuni tamani atuartut amerlassusiisa katinnerat 40-mik agguarlugu. Sapaatip-akunnera pikkorissarfik tassaatinneqassaaq ullut-unnuallu pikkorissarfiit arfineq-marluk.

Imm. 3-mut

Aalajangersakkami aalajangersarneqarpoq, efterskolinut pilersinneqarlaanut, sulilu ukioq Aningaasanut Inatsiliorfiusoq sioqqullugu tapiiffigineqanngitsunut ilinniartut akuerisatut aalajangikkat amerlassusaat aallaavigineqassasoq. Ilinniartut akuerisatut amerlassusaat ima paasineqassaaq, isumaqatigiissutigineqarsimasut ilinniartut amerlassusaat efterskolimi annerpaamik inissaqartinneqartutut tigusinnaasaat.

Imm. 4-mut

Aalajangersakkami aalajangersarneqarpoq, Naalakkersuisut efterskolinut tapiissutit naatsorsornissaat, tunniunnissaat aqutarinissaallu pillugit malittarisassanik aalajangersaasinnaasut. Aammattaaq Naalakkersuisut ukiumoortumik ilinniartut ikinnerutillugit sapaatip-akunnerisalu atuartitsiviusut ingerlanneqartut ikinneruneranni tapiissutit ikilisinnissaat pillugit malittarisassanik aalajangersaasinnaapput.

§ 14-imut

Ilinniartunut tapiissutit pillugit aalajangersakkanut atatillugu malugeqquneqarpoq, Nunatsinnut attuumassuteqartuunissaq ersarinnerusumik nassuiarneqanngimmat, tassami assersuutigalugu ilinniartut Danmarkimeersut Kalaallit Nunaanni efterskolersinnaanerat periarfissikkumaneqarpoq, soorluttaaq ilinniartut Kalaallit Nunaanneersut Danmarkimi efterskolersinnaasut.

Imm. 1-imut

Aalajangersakkami aalajangersarneqarpoq, Ilinniartut efterskolernerminni akiliutissaasa annikillisinnissaannut, isertitat aallaavigalugit aalajangerneqartunik, Naalakkersuisut tapiissuteqartassasut. Tapiissutit inummut ataatsimut tapiissutit, Naalakkersuisunut ilinniartup akiliutaata appartinneqarnissaanik qinnuteqartoqareerneratigut, tunniunneqartarput. Ukiumoortumik Aningaasanut Inatsimmi ilinniartunut tapip annertussusissaa Naalakkersuisut aalajangissavaat.

Imm. 2-mut

Aalajangersakkami ersarissarneqarpoq, ilinniartut akiliutaannik annikillisaanissamut tapiissutit efterskolimut tunniunneqassasut.

Imm. 3-mut

Aalajangersakkami aalajangersarneqarpoq, Naalakkersuisut aalajangersinnaagaat ilinniartunut tapiissutit kommunalbestyrelsimit aquunneqassasut. Taamaalillutik Naalakkersuisut ilinniartunut tapit aqutarinerinut akisussaaffiup tunniunnissaanut periarfissinneqarput.

Imm. 4-mut

Aalajangersakkami aalajangerneqarpoq, Naalakkersuisut ilinniartunut tapit Namminersornerullutik Oqartussat ataanni suliffeqarfimmit immineertumit allaffissornikkut isumagineqassasut, ilinniartunullu tapit allaffissornikkut ingerlannissaannut pisussaaffiliisinnaallutik

Imm. 5-imut

Aalajangersakkami erseqqissarneqarpoq, Naalakkersuisut ukiumoortumik Aningaasanut Inatsisitigut skalatut aalajangertassagaat isertitatigut tunngaviusut isertitallu aallaavigalugit ilinniartumut tapip aningaasartaasa akornanni naleqqiussissutissaq. § 14-imi oqaaseq "ilinniartut akiliutissaat" atorneqarpoq, tassaasoq ilinniartumut aningaasartuutissaasut tamarmiusut. Aningaasat angajoqqaat akiligassat taaneqarput "angajoqqaat akiliutaat", tassaasoq imm. 6 naapertorlugu naatsorsorneqartussaq, taamaattorli angajoqqaat isertitaasa malunnaatilimmik allanngornerisigut allanngortinneqarsinnaasoq.

Aammattaaq angajoqqaat isertitamikkut tunngavissaata appartinnissaat Naalakkersuisunit aalajangersarneqassaaq, ilinniartup efterskolernerup aallartinnerani qatanngutaasa 18-it inorlugit ikiullit amerlassusaat aallaavigalugu. Aalajangersakkap taassuma qularnaassavaa angajoqqaat isertitamikkut tunngavigisaasa aamma qatanngutit 18-it inorlugit ikiullit amerlassusaasa ilinniartup efterskolimi ilinnialernissaanik akornusiinnginnissaat.

Imm. 6-imut

Aalajangersakkami erseqqissarneqarpoq, angajoqqaat isertitaannut tunngaviusoq tassaammat ullorsiutit malillugit ukiup piffissap tapiiffiusup aallartiffiata siornatigut ukiut aappaanni nammineerluni isertitarisat. Aalajangersakkap assersuutigalugu nassatarivaa, ilinniartup akiliutissaanik annikillisaanissamut tapiissutit, isertitat tunngavigalugit naatsorsorneqartussat, ukiumi atuarfiusumi 2009/10-mi annertussusissaat naatsorsorumallugu angajoqqaat 2007-imi isertitaat aallaavigineqassammata.

Imm. 7-imut

Aalajangersakkami matumani imm. 6-imi aalajangersakkat sanioqqunneqarsinnaanerit periarfissinneqarpoq, angajoqqaat isertitaat malunnaatilimmik allannguuteqarsimappata.

§ 15-imit

Imm. 1-imit

Aalajangersakkami aalajangerneqarpoq, Naalakkersuisut ilinniartup angerlarsimaffimminiit efterskolimut aamma efterskolimiit angerlarsimaffimminut angalaneranut aningaasartuutit akilissagaat. Angalaneq Naalakkersuisunit akilerneqassaaq efterskolernerup aallartinnerani, kipitinnerani naammassineraniluunniit.

Imm. 2-mut

Aalajangersakkami aammattaaq periarfissinneqarpoq Naalakkersuisut, ilinniartup qanigisami perulunneranni toqunerannilu angerlarsimaffimminut utimullu angalanerani aningaasartuutinik matussusiinissaat. Qanigisat tassaapput aappaariunnagaq, nammineq meeqqat, angajoqqaatut oqartussaasut/pilersuisuiusut, qatanngutit aamma aanaa/aataakkut. Peruluttoqarnera toqusoqarneraluunniit nakorsamit uppernarsaaserneqassaaq.

Malugeqquneqarpoq qanigisanut nassuiaataasut qulaaniittut tamatigut tamakkiisuunavianngimmata, taamaammallu pisuni ataasiakkaani pisariaqalersinnaammat qulaani eqqaaneqartunik allaanerusumik ilaqutariissutsit erseqqissumik nalilersornissaat.

Imm. 3-mut

Aalajangersakkami aalajangiunneqarpoq, tapiissutit angalanernut atatillugu tunniunneqassammata, efterskolimullu aningaasartuuteqartuusumut tunniunneqassallutik.

§ 16-imit

Imm. 1-imit

Aalajangersakkami aalajangerneqarpoq, efterskolit pisortaasa ilinniartitsisuisalu ilinniartuarnissaat siunertaralugu pikkorissaanernut Naalakkersuisut tapiissuteqarsinnaasut, meeqqat atuarfianni pisortanut ilinniartitsisunullu atugassarititaasut assingannik. Aalajangersakkami uani pisortat ilinniartitsisullu kisimik ilaatinneqarput.

Imm. 2-mut

Aalajangersakkap erseqqissarpaa, Naalakkersuisut pisortat ilinniartitsisullu ilinniaqqinnerminni piffissap ilaa tamakkiisumilluunniit sulinngiffeqartut akissarsiaqartinnerinut tapiissuteqarsinnaasut. Efterskolini ilinniartitsisut pisortallu pikkorissarnernut ilinniaqqinnernullu assersuutigalugu Ilinniarfissuarmit Inerisaavimmillu neqeroorutigineqartunut peqataasinnaapput.

Imm. 3-mut

Aalajangersakkap aalajangerpaa, tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassasut.

§ 17-imut

Aalajangersakkami aalajangerneqarpoq, Naalakkersuisut immikkut atuartitsinermut aamma allatigut immikkut perorsaanikkut ikiorsiinissamut tapiisarnissaq pillugu malittarisassaliorinnaasut, ilinniartut immikkut atuartinneqarnissamik aamma immikkut perorsaanikkut ikiorserneqarnissamik pisariaqartitsisut pineqarlutik.

§ 18-imut

Imm. 1-imut

Aalajangersakkami aalajangerneqarpoq, efterskolini siulersuisut siunertamik iluanni Naalakkersuisunit tapiissutit isertitallu allat ataatsimut isigalugit atornissaat namminneq aalajangersinnaagaat. Aalajangersakkap erseqqissarpaa, siulersuisut aningaasaliissutinik atuisinnaatitaanerit killilerneqartoq, tapiissutinut tunngaviusut naapertorlugit tapiissutit atorneqassallutik, pineqarlutik atuartitsineq aamma atuartut amerlassusaat.

Imm. 2-mut

Aalajangersakkami erseqqissarneqarpoq, efterskole suliffeqarfittut imminut pigisutut, ukiumi naatsorsuiffiusumi aningaasanik atunngisanik ukiumut naatsorsuiffiusumut tullermut nuussisinnaasoq. Aalajangersakkap siunertaraa aningaasat ukiumi aningaasaliiffiusumi atorneqanngitsut ukiumut naatsorsuseriffiusumut tullermut nuunneqarsinnaanissaat, aningaasaliissutaasunut sunniuteqanngikkaluartumik.

§ 19-imut

Aalajangersakkap Naalakkersuisut pisussaaffilerpai tapiissutinik utertitsinissaq unitsitsinissarlu pillugit malittarisassanik aalajangersaanissamut. Taamaalilluni Naalakkersuisut pisinnaatinneqarput assersuutigalugu tapiissutinik utertitsinissaq unitsitsinissarlu pillugit aalajangersagaliornissamut, efterskolit ingerlatassat

tapiissuteqarnermut tunngaviusut ingerlatinngippatigik, Naalakkersuisullu nakkutilliinermi uparuaanerat maleruannngippassuk.

§ 20-mut

Imm. 1-imut

Aalajangersakkami Danmarkimi efterskolernernut tapiissutit pillugit aalajangersakkat maanna atuuttut ingerlateqqinneqarput, aalajangersarneqarlunilu Naalakkersuisut Danmarkimi efterskolernermut aningaasartuutitut tapiissuteqarsinnaasut, soorluttaaq ilinniartut akiliutaasa annikillisinnissaannut tapiisoqarsinnaasoq, aamma ilinniartut angalanerinit aningaasartuutit akilerneqartassasut.

Aammattaaq siunnersuutip erseqqissarpaa, pineqartut tassaammata aningaasartuutit aningaasaliissutitut pituttorsimasut (Tapiissutit aningaasaliineq), taamaalillunilu ukiumoortumik Aningaasanut Inatsisini sinaakkusiunneqartut qaangerlugit tapiisoqarsinnaangimmat. Qinnuteqartut ataasiakkaat qinnuteqaataasa suliarineranni imaluunniit tapiissutisiassaasa tunngavissaasa naatsorsorneranni allannguinnissaq anguniarneqannilaq, taakku maannamut kontomi pingaarnermi 40.10.12-imi ersissapput.

Imm. 2-mut

Aalajangersakkami ingerlateqqinneqarput, Naalakkersuisut tapiissutit tunniunneqarnissaa pillugu malittarisassanik aalajangersaasinnaanerat, ilutigisaanillu tapiisarnissamut tunngaviusumik piunasaqaataasoq erseqqissarneqarluni, tassunga ilanngullugit tapiisarnissamut piunasaqaatit, tapiissutit annertussusaat, qinnuteqarnermi periusissat aamma maalaarnissamut aqutissat. Naalakkersuisut innersuutigissavaat Meeqqat atuarfiat pillugu Inatsisartut peqqussutaanni nr. 1, 6. juni 1997-imeersumi § 10, imm. 5 aamma 11, tak. Atuarfik pillugu Inatsisartut peqqussutaat nr. 8, 21. maj 2002-meersoq, Inatsisartut peqqussutaatigut nr. 7, 7. maj 2007-imeersukkut allanngortinneqartoq, taanna malillugu Danmarkimi efterskolernermut aningaasartuutitut tapiissuteqartoqartarmat.

§ 21-mut

Aalajangersakkami aalajangerneqarpoq, Naalakkersuisut nakkutilliisuusut. Ulluinnarni Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik nakkutilliinermik ingerlatsisuusaaq. Nakkutilliinerup isumaginissaanut atatillugu Naalakkersuisut efterskolinit saaffiginnillutik paasissutissanik pisariaqartunik piniarsinnaapput.

Naalakkersuisut nakkutigissavaat, efterskolit §§ 1 – 6-imi aamma § 18, imm. 1-imi piunasaqaatinik piviusunngortitsinerat.

§ 22-mut

Aalajangersakkap Naalakkersuisut pisinnaatippai, Inatsisartut inatsisaanni aalajangersakkanik sanioqquitsinissamut, aningaasaliissutaasut iluanni misileraalluni ingerlatsinermut atatillugu. Aalajangersakkap siunertaraa inuiaqatigiinni ineriartornerup pisariaqartitsilernera naapertorlugu misileraalluni ingerlatsinernik pilersitsisoqarsinnaanissaata qularnaarnissaa.

§ 23-mut

Imm. 1-imut

Siunnersuutigineqarpoq Inatsisartut inatsisaat atuutilissasoq 1. januar 2009. Tamatumunnga pissutaavoq siunissami efterskoliujumaartut ukiumi atuarfiusumi 2009/10-mi Inatsisartut Inatsisaat manna naapertorlugu aallartisarsinnaanissaannik periarfissinneqarnissaat.

Imm. 2-mut

Aalajangersakkami aalajangerneqarpoq, meeqqat atuarfiat pillugu peqqussummi nr. 1-imi, 6. juni 1997-imeersumi § 10, imm. 5 aamma § 11 inatsisip atuuttuulernerani atorunnaarsinneqassasut.

Imm. 3-mut

Aalajangersakkami erseqqissarneqarpoq, meeqqat atuarfiat pillugu peqqussummi nr. 1-imi, 6. juni 1997-imeersumi § 10, imm. 5 aamma § 11 naapertorlugit malittarisassat aalajangersarneqarsimasut atorunnaarsinneqarnissamik imaluunniit taarserneqarnissamik tungaannut atuuttuussasut.